

## **Pexanialivaisi Jesucristo pelivaisi, San Marcos peyaquinaelivaisi**

*Pacuenia Juan jivibautisabinë jivi livaisi tsi-  
paeba petusato nacuata yabara pelivaisi  
(Mt 3.1-12; Lc 3.1-9, 15-17; Jn 1.19-25)*

<sup>1</sup> Mara pacuenia taxuxuaba pexanialivaisi, Jesucristo Dioso pexënato pelivaisije.

<sup>2</sup> Bajayata Diosojumepaebinëmi, profeta Isaíaspijinë, tajëvelia yaquina Dioso pejumaitsijava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumelivaisi-  
paebinënexa. Catsivajënaexanebijitsia  
nijanamuto. <sup>3</sup> Nexata tanejumelivaisi-  
paebinë vavajai tsane petusato nacuata.  
Jumaitsi tsane jivijavabelia: “Jivi baxaneba  
panamutoverena najetaruaejitsia  
petuxanenë. Batoroviaexananua namuto.  
Bajara pijinia pacuenia paxamë ata  
panajamatabëcuenexaniavaere pepo petuxa-  
nenë pepatsivajënaeya paxamëjavaberena,”  
jai tsane tanejumelivaisipaebinë xamë  
yabara,

jai bajayata tajëvelia Dioso pexënatojavabelia  
pejumaitsijava Juan jivibautisabinë jivijavabelia  
Dioso pejumelivaisi petsipaebanajetaruaeja-  
vanexa yabara.

<sup>4</sup> Bajaraxuata nexata Juan jivibautisabinë Dioso pejumelivaisipaebinë najetaruca petusato nacua-  
java Jesús pevajënaeya. Juan jivijavabelia jumai  
tsaponae mapacueniaje:

—Pacopabare pibisiacuene paneexan-  
abiabijava. Panajamatabëcuenepënëyorore  
Diosojavabelia. Bajaraxuacujinae pacabautisabi-  
anatsi. Nexata Dioso pacavecuaajibiaexanaena  
panijaneconimi, jai tsaponae Juan jivijavabelia.

<sup>5</sup> Nexata ayaibitsaëtoxaneto Judea nacuapijivi,  
Jerusalén tomarapijivinua, muxunaponabiabatsi  
Juan petsipaebilivaisi penamuxunaevetabi-  
abinexatsi. Nexata bajarapamonae pibisiacuene  
pexanaejavami, roviaia Diosojavabelia  
navecuapaebapona. Bajaraxuacujinae Juan  
bautisabapona bajarapamonae Jordán meneta.

<sup>6</sup> Juan naxatata camellonata pexanaejava.  
Naepacëta cuerobocoto. Pexaejava ëbosese, jabëra  
yajava. <sup>7</sup> Juan Jesús pelivaisi jivi tsipaebapona.  
Jumai tsaponae tajëvelia Jesús yabara:

—Tacovëverena patsiana itsanë. Bajaraponë  
daxitacuene pexanaenexa pecaëjëpaenëtsi tsane.  
Xanë raja saya beveliajamatabëcuenenënë  
bajaraponëvecua. Nexata vecuaauranë  
bajaraponë bepijajivitonënë tanataenexa.  
Nexata auranë pijazapato ata tataxujonotsinexa.

<sup>8</sup> Xanë raja saya pacabautisabatsi merata.  
Ponë rajane xanëcujinae patsiana, bajaraponë  
pacatsijamatabëjoneyaexanaponaena Espiritu  
Santo, jai tsaponae Juan jivijavabelia Jesús  
yabara tajëvelia pevajunupaebijavata Jesús  
penajetarucaejavanexa.

*Pacuenia Juan bautisaba Jesús yabara pelivaisi  
(Mt 3.13-17; Lc 3.21-22)*

<sup>9</sup> Jesús najetaruca Nazaret tomaraverena, Galilea nacuata peecaetomaraverena. Nexata Juan bautisaba Jesús Jordán meneta. <sup>10</sup> Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espíritu Santo ata perunaejavatsica pematatsënëatsica beucucuto. <sup>11</sup> Jesús jumetanenua athëbëvetsica Dioso pejumaitsijavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

*Pacuenia Jesús jamatabëcuenejëbatsi dovathi  
yabara pelivaisi  
(Mt 4.1-11; Lc 4.1-13)*

<sup>12</sup> Jesús Juan pebautisabicujinaetsi, bepijiayo Espíritu Santo ponaeyaexanatsi petusato nacuayabelia. <sup>13</sup> Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenejëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

*Pacuenia Jesús Galilea nacuata taxuxuaba  
Dioso pitorobilivaisi jivi petsipaebijava yabara  
pelivaisi  
(Mt 12.12-17; Lc 4.14-15)*

14 Juan penaneconitsiaexanaenexatsi vajabit-saë vaetabatsi. Nexata penaneconitsivi peje-babiabibota Juan naneconitsiaponapona. Nex-ata abaxë Juan penaneconitsivi pejebabiabibota itsa ponapona, Jesús najetaruca Galilea nacua-javaberena. Jesús jivi tsipaebaponarena pexa-nialivaisi. Tsipaebaponarena daxita Dioso pijajivi pevetsijavanexa. 15 Jesús jumai tsaponae jivijav-abelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuenepënëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

*Pacuenia Jesús junata cuatro ponëbeje dujuai peyamatajucabiabivi yabara pelivaisi (Mt 4.18-22; Lc 5.1-11)*

16 Jesús najetaruca Galilea pucaxaneto itapaya. Nexata Galileapuca itapata Jesús taenuta ani-janëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia du-juai yamatajucabiababeje. 17 Nexata Jesús ju-maitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, ba-jarapacuenia jivi pajucaenamebeje Dioso pija-jivinexa, jai Jesús bajaraponëbejejavabelia.

18 Nexata bajaraponëbeje dujuai peyamataju-cabiabijavamibeje bajarajota puenetabuatabeje. Nexata baja naponabeje Jesús pepëta.

19 Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanëbanucabeje dujuai peyamatajucaejavabeje. 20 Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

*Pacuenia pebi dovathi peyajavaponaponaenë  
Jesús jamatejemayaexana yabara pelivaisi  
(Lc 4.31-37)*

21 Nexata Jesús, pijajivi yajava, pata Capernaum tomarabelia. Judíovi penacueraevetsimatacabita Jesús joneya judíovi penacaetuatabiabiboy-alia. Nexata bajarajota Jesús jivi livaisi tsipaeba. 22 Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Díoso pitorobinëtsicuenia. Apo tsipaebi pacuenia judíovi pecujarubivi tsipaebabiaba. 23 Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

24 —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

25 Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

26 Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua.

27 Nexata daxitajivi bajarapacuene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneje? ¿Detsa mapitsipejanacujarubicueneje? ¡Maponëje Jesús, beDioso pitorobinëtsitsica! ¡Dovathi ata jumecovënëtatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

28 Nexata daxita Galilea nacuapijivi bepíjia Jesús vënëlivaisitanetsi Dioso pesaëta pinijicuene pexanaponaejava.

*Pacuenia Simón Pedro pijava pena Jesús tojamatejemayaexana yabara pelivaisi  
(Mt 8.14-15; Lc 4.38-39)*

29 Jesús baja pitsapa judíovi penacaetuatabiabi-bovecua. Nexata Santiagobeje Juanbeje Jesús yajavapona. Jesúsbana naponna Simónbeje Andrésbeje pijaboyabelia. 30 Nexata Simón pijabota Simón pijava pena Jesúsbana pevajënae romaebanucatsi

camata. Nexata itsamonae bepíjia Jesús tsipae-barëcëpatsi bajarapova peromaebanucaejavatsi. <sup>31</sup>Nexata Jesús imoxoyotabilia peromaebanucaevatsi. Cobeyotsiaya maticota. Nexata bajara-jota peromaebanucaevatsi vecuaajibi tsanajetsit-sireca baja domae. Nexata bajarapova Jesús bana pexaejava toexanatsi.

*Pacuenia ayaibitsaëto jivi piavitanevi Jesús jamatejemayaexana yabara pelivaisi*  
(Mt 8.16-17; Lc 4.40-41)

<sup>32</sup> Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua. <sup>33</sup> Daxita tomarapijivi Jesús pepatsibota baupajavaberena nacaetuata. <sup>34</sup> Nexata Jesús jamatejemayaexana ayaibitsaëto daxitacuenevitane pexainaevimi. Vecuacapitsapanua dovathi peyajavajinavana-paevi. Jesús apo tocopatsi dovathi pecuaicuai-jainexa jivijavabelia pevajunupaebiyativatsi. Tsipaji dovathi xaniavaetsia Jesús yapëtanetsi Dioso pexënatocuene.

*Pacuenia Dioso pitorobilivaisi Jesús jivi tsipaeba Galilea nacuata yabara pelivaisi*  
(Lc 4.42-44)

<sup>35</sup> Pepo bajayacunua, abaxë itsa apo nape-betsi maticabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta maticabi baja. <sup>36</sup> Itsa baja maticabi, Simónbana Jesús pëjaitaponalia. <sup>37</sup> Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

<sup>38</sup> Nexata Jesús jumaitsi:

—Ponatsi baja imoxoyo penaetomaraxi-javabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

<sup>39</sup> Nexata daxita Galilea nacujava Jesús jivi tsi-paebapona Dioso pitorobilivaisi judíovi penacae-tuatabiabibonëjava. Jesús jivi dovathi vecuacapit-sapaponanua.

*Pacuenia Jesús jamatejemayaexana bajayajebi bitso peperabëtsabanaenë yabara pelivaisi*

*(Mt 8.1-4; Lc 5.12-16)*

<sup>40</sup> Jesús imoxoyorenatsi bajayajebi bitso peper-abëtsabanaenë. Nexata bajaraponë pematatabetä nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

<sup>41</sup> Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jãjã, jitsipajë cajena. Jamatejemamë rabaja, jai Jesús peperabëtsabanaenëjavabelia.

<sup>42</sup> Bajarapacuenia Jesús pejumaitsi-javata peperabëtsabanaenëmi baja per-abëxanepananajereca. Jamatejema baja. Peperabëtsabanaejavami baja ajibi. <sup>43</sup> Nexata baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:



44 —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuaajibijava niavitanejavami, jai picani Jesús bajayajebi bitso peperabëtsabanaenëmijavabelia.

45 Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabiabatsi Jesús.

## 2

*Pacuenia Jesús jamatejemayaexana petabusi-pacuenabinëtsi yabara pelivaisi*

*(Mt 9.1-8; Lc 5.17-26)*

1 Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. 2 Nexata jivibitsaëtoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. 3 Nexata cuatro ponëbeje parena,

camayota peyavëtacaranajetarubenaevi petabusipacuenebinëtsi. <sup>4</sup> Nexata petabusipacuenabinëtsi acuenebi bajarapamonae pecapatsijava Jesús pitabarayabelia. Tsipaji bo ënëtuatujë bitso jivi yavënëca. Nexata petabusipacuenabinëtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenebinëtsi. <sup>5</sup> Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabanänë, pibisiacuene rabaja nexanaeconimi cavecuaajibiaexanatsi, jai Jesús.

<sup>6</sup> Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumaitsijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

<sup>7</sup> —Maponëje Jesús Dioso apo pejitsipaecuenia cuaicuaijai. Itsanë ata cajena apo caëjëpaetsi itsajivi pibisiacuene pexanaecononi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacuenë, jamatabëjai tsenae bajarapamonae.

<sup>8</sup> Jesús jamatabëcueneyapëtane bajarapamonae jamatabëcuenenavëxaniabiaya bajarapacuenia pesivanajamatabëxinaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivana-jamatabëxainame. Tsipaji cajena xanë necaējëpa jivi pibisiacuene pexanaeneconimi tavecuaajibiaexanaenexa.<sup>9</sup> Paxamë apo pacacaējëpae ata itsajivi pibisiacuene pexanaeneconi panevecuaajibiaexanaenexa, pacacaējëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaējëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaējëpaeacuene panejamatejemayaexanaenexa, jai nexata Jesús judíovi pecujarubivijavabelia.

<sup>10</sup> Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaējëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaējëpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusi-pacuenebinëtsijavabelia:

<sup>11</sup>—Xamë cajumaitsitsi. Nonotapunare. Nijacamayó pire. Nijaboyabelia baja ponare, jai Jesús.

<sup>12</sup> Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenie, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

*Pacuenia Jesús pijajivitonënexa junata Levívënënë yabara pelivaisi*

*(Mt 9.9-13; Lc 5.27-32)*

<sup>13</sup> Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia.

<sup>14</sup> Bajaraxuacujinae penajetarucæjavata Jesús taeyeta Levívënënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

<sup>15</sup> Nexata Leví junata Jesús pebarënananinexa pijabota. Nexata Leví pijabota Jesús pexæjava naxane. Leví pijabota ayaibitsaëto naena gobierno pejamatabëcuene jivijavabelia

impuestomatamo pematamoyanijobabiabivi. Itsamonae ata nanabane piajamatabëcuenebejevi. Nexata Jesús pijajivi nabarëca bajarapamonaejavata. <sup>16</sup> Nexata fariseovi, judíovi pecujarubivinu, Jesús taeyetatsi daxita bajarapamonaejavata pijajivi penabarënanabaneajava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, piajamatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

<sup>17</sup> Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacue pexanaejava penajamatabëcuenepënëyorotsinexa Diosojavabelia, jai Jesús bajarapamonaejavabelia.

*Pacuenia Jesús yanijobatsi pamatacabibeje jivi vajëtaçona Diosojavabelia pexaejava apo pexaeyabiabixae yabara pelivaisi (Mt 9.14-17; Lc 5.33-39)*

<sup>18</sup> Itsamatacabi Juan pijajivi, fariseovi pijajivinu, pexaejava apo xaevanapae pamatacabibeje Diosojavabelia vajëcaçona. Nexata itsamonae

Jesúsjavaberenapata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëtapona. ¿Detsa xuajitsia itsiata xamë nijajivi pexaejava xaeyabiaba pamatacabibeje Diosojavabelia vajëtapona? jai Jesús peyanijobivitsi.

<sup>19</sup> Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atso bi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamona.

<sup>20</sup> Itsiata baitsi jane itsa pejananacasabinë tsimaxëpatsipatsi pevecuacaponanexatsi itsajavabelia, nexata bajarapamona pexaejava apo xae tsipae. Tsipaji bitso najamatabëxainaejitsipa pevecuacaponaeatsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

<sup>21</sup> Nexata bajarapamonaeperujamatabëcuene baja pecopabinexa, Jesús livaisi tsipaeba comparacióncuena bajarapamona pejumecovënëtsinexa ëpejanalivaisi, Jesús petsipaebilivaisi. Bajarapamonaeanijajamatabëcuenebeje pexainaejaniva perujamatabëcuene baja pecopabinexa, Jesús livaisi tsipaeba

comparacióncuena. Perujumatabëcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. <sup>22</sup> Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamona pejumecovënëtsinexa ëpejanalivaisi, Jesús petsipaebilivaisi, perujumatabëcuene baja penacopabinexa.

*Pacuenia Jesús pijajivi namutua siricanajetarubena trigoxu penacueraevetsimatacabita yabara pelivaisi*

*(Mt 12.1-8; Lc 6.1-5)*

<sup>23</sup> Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi pïajanixae, trigoxu siricanajetarubena. Xuxaeyabuatapona.

<sup>24</sup> Nexata fariseovi jumaitsi Jesúsjavabelia:

—¡Taema mapacueneje! Dioso Moiséspijinëta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacueneje, jai fariseovi Jesúsjavabelia.

<sup>25</sup> Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani? <sup>26</sup> Davidpijinë joneya Dioso pijatemployolia pamatacabi Abiatarpijinë daxita sacerdotevi penamatacaitorobinë tsaponapona. Nexata Dioso pijatemplobënëta, mesajumata, bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyanima Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

<sup>27</sup> Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tsipaji Dioso yapëtane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianë. <sup>28</sup> Nexata xanë, Daxitajivi Pematapijinënë, netoxanepana



cajena tatsipaebinea pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

### 3

*Pacuenia Jesús jamatejemayaexana pebi pecobetsaquenaenë yabara pelivaisi*

*(Mt 12.9-14; Lc 6.6-11)*

<sup>1</sup> Penacueraevetsimatacabita Jesús joneya judíovi penacaetuatabiboyalia. Nexata bajarajota pebi naeca pecobetsaquenaenë.

<sup>2</sup> Nexata Jesús naitaxutocaevetatsi fariseovi petaenexatsi pecobetsaquenaenë pejamatejemayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonae. <sup>3</sup> Nexata Jesús jumaitsi pecobetsaquenaenëjavabelia:

—Nonotapunare. Nucare mapamonae pitabarataje, jai.

<sup>4</sup> Nexata Jesús jumaitsi fariseovijavabelia:

—Penacueraevetsimatacabita ata xanepana va-jaexanaenexa pexaniacuene. Xanepana vaja-jamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi.

<sup>5</sup> Nexata Jesús anaeya naëcota bajarapamonae. Bajaraxuacujinae Jesús bejamatabëjireca. Tsipaji yapëtane piajamatabëcuetajajava

fariseovi. Nexata Jesús jumaitsi pecobetsaque-naenëjavabelia:

—Namaxërovire, jai.

Nexata pecobetsaquenaenë namaxërovita. Bajarajota cobexanepananajereca baja. Pecobetsaquenaevajavami ajibi. <sup>6</sup> Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata bajarapabovecua pitsapa. Pona penabarëcuaicuaijainexa nacuaevetsinë Herodes pijajivijavabelia. Bajarapamonae najumejaita Jesús pebexuabinexatsi.

*Pacuenia jivi nacaetuata Galilea pucaxaneto itapata yabara pelivaisi*

<sup>7</sup> Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëtoxaneto Galilea nacuapijivi. <sup>8</sup> Nexata Jesús pënaponaliatsi Judea nacuapijivinua, Jerusalén tomarapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pënaponaliatsi tsipaji Jesús vënëlivaisitanetsi Dioso pesaëta pinijicuene pexanaponaejava. <sup>9</sup> Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaëtoxaneto Jesús bitso matacënënaponatsi, nexata bajarapamo ënëabereca Jesús perunaenexareca. <sup>10</sup> Jesús baja ayaibitsaëto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

11 Dovathi peyajavajinavanapaevi Jesús ita taeyabiabatsi, bajarapamonae irata othopabiaba Jesús pitabarata. Bajarapamonae aëjai tsabiabi.

—Xamë tsaena Dioso pexënatomë, jai tsabiabi dovathi peyajavajinavanapaevi.

12 Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivijavabelia, jai Jesús bajarapamonae-javabelia.

*Pacuenia Jesús pijajivi ayaibit-saëtoxanetoyajuvënëvi itapeta saya doce ponëbeje apóstolevinexa yabara pelivaisi*

*(Mt 10.1-4; Lc 6.12-16)*

13 Jesús pijajivi ayaibitsaëtoxanetoyajuvënëvi, doce saya ponëbeje, itapeta apóstolevinexa. Jesús pitapetsivajënae apóstolevinexa, junaya petsutojumabetsia. Bajaravetsica Jesús junatanuca ponëbeje jamatabëitapeta apóstolevinexa. Nexata pamonae Jesús itapeta apóstolevinexa, junaya petsutojumabetsia, Jesúsjavabetsia.

14 Nexata Jesús caetuata caebitsaëtoyo, doce ponëbeje pijajivi, pepënajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi.

15 Jesús pijajivi jamatabëcuenecaëjëpaeyaexana Dioso pesaëta pejamatejemayaexanaponaenexa piavitanevi. Jamatabëcuenecaëjëpaeyaexananua Dioso pesaëta dovathi jivi pevecuacapitsaponaenexa. 16 Jesús pijaapóstolevi, doce ponëbeje, mapevënëanëje. Copiaya ponë pevënë Simón. Bajaraponë

Jesús vënëruba itsavënë, Pedro. <sup>17</sup> Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexënatobeje. Bajaraponëbeje Jesús vënëruba Boanerges. “Boanerges,” itsa jai, bajarapamonae pijajumeta mapajumetaje pejumaitsijume: “Yamaxë pexënatobeje,” pejaijume. <sup>18</sup> Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexënato. Itsanë Tadeo. Itsanë Simón, celotenë. <sup>19</sup> Itsanë Judas Iscariote. Bajaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

*Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta, Jesús dovathi jivivecua capitsapapona,” jai yabara pelivaisi*

*(Mt 12.22-32; Lc 11.14-23; 12.10)*

<sup>20</sup> Jesús boya joneya pijajivi yajava. Icatsia jivibitsaëtoxaneto nacaetuata. Nexata acuenebi Jesús pijajivi pebarënananijava. <sup>21</sup> Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsijava, Jesús pijamonae vënëlivaisitanetsi. Nexata Jesús pijamonae ponarena Jesúsjavaberena pebarëponaenexatsilia picani.

<sup>22</sup> Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi

jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

<sup>23</sup> Nexata Jesús junata bajarapamonae jamatabëcuenenavëxaniabiaya pejumaitsijava pecanaëjëtsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua itsa capitsapaponaejitsipa, nexata Beelzebú bepijavajabitsaë taejitsipa pijajivi. <sup>24</sup> Pacanaëjere mapacuenije. Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. <sup>25</sup> Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. <sup>26</sup> Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepijavajabitsaënë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

<sup>27</sup> Bajarapamonae pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalía peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi.

Taxucëtabuatsipatsi yajava. Matapania bajara-pacuenia yacajërëtsipatsi daxita xua xaina pijab-ota. Bajara pijinia pacuenia xanë ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

<sup>28</sup> Xaniajanë pacuenia pacatsipaebatsi. Dioso cajena caëjëpatsi daxitajivi pibisiacue-  
n pexanaeneconi pevecuaajibiaexanaenexa. Pibisiacuenia jivi Dioso baracuaicuaijai ata, bajarapaneconi ata Dioso caëjëpatsi pevecuaa-  
jibiaexanaenexa. <sup>29</sup> Itsiata baitsi jane pajivi pibisiacuenia baracuaicuaijai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matacabijavabelianexa, jai Jesús bajarapamonaejavabelia.

<sup>30</sup> Bajarapacuenia Jesús jumaitsi tsipaji Jesús Espíritu Santo yjavaponaponae atatsi, judíovi pecujarubivi jumaitsi Jesús yabara: “Jesús raja Beelzebú yjavaponapona,” jai. Nexata bajaraxu-ata bajarapamonae naneconita Espíritu Santojavabelia.

*Pacuenia Jesús pejuyapijivi, pena yajava, nubena bojumavelia yabara pelivaisi*

*(Mt 12.46-50; Lc 8.19-21)*

<sup>31</sup> Jesús pejuyapijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia. <sup>32</sup> Nexata pamonaie Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenë, ena raja, nejuyapijivi yajava, nuca patapënëverena. Cajaita raja xamë, jai bajarapamonae Jesúsjavabelia.

<sup>33</sup> Nexata Jesús jumaitsi bajarapamonaejavabelia:

—¿Detsa pitsijamatabëcuenevi taena, tajuyapijivinu? jai Jesús.

<sup>34</sup> Bajaraxuacujinae Jesús naëcota pematatoyorotsiaenaevitsi. Jumaitsi bajarapamonaejavabelia:

—Mara jota pamonaе xanëjavata penaevije, bajarapamonae jane taenajivi, tajuyapijivinu.

<sup>35</sup> Tsipaji raja pamonaе exana pacuenia Dioso itorobatsi, bajarapamonae jane baja tajuyapijivi, taenajivinu, jai Jesús bajarapamonaejavabelia.

## 4

*Pacuenia Jesús jivi livaisi tsipaeba peubinë pelivaisicuenia yabara pelivaisi*

*(Mt 13.1-9; Lc 8.4-8)*

<sup>1</sup> Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoخانeto nacaetuata itsajota Jesús livaisi tsipaebanuca. Nexata Jesús runareca jera ënëabereca. Ecareca jera ënëtareca. Daxita jivibitsaëtoخانeto tajetabovelia nubena. <sup>2</sup> Nexata Jesús daxitacuene livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

<sup>3</sup> —Panenamuxunaevere mapalivaisije. Peubinë pona pabiabelia peubinexa. Nexata itsa pata pabita, peubixu pexucayabajarabicuenia

ubanajetaruca. <sup>4</sup> Nexata pexucayabajara-bijavata itsaxu othopa pabi tuatujëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. <sup>5</sup> Itsaxu pijinia othopa ibopananëjumata, itsajota bitso ira apo aitayaë. <sup>6</sup> Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. <sup>7</sup> Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë maticënënatsi peubijavami. Nexata peubijava apo xainae pecuai. <sup>8</sup> Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

<sup>9</sup> Nexata icatsia Jesús jumaitsi jivibit-saëtoxanetovavabelia:

—Pajivi jamatabënejumeyapëtane patacatsipae-bilivaisi, nenamuxunaevetsi xaniavaetsia, jai Jesús.

*Pacuene yabara Jesús jivijavabelia livaisi tsi-paeba ëcomparacióncuenia yabara pelivaisi (Mt 13.10-17; Lc 8.9-10)*

<sup>10</sup> Jesús livaisi petsipaebicujinae, jivibit-saëtoxaneto baja Jesús vecuanaviabatsi. Nexata Jesús pijaepato barënacopata doce ponëbeje pijajivi, itsamonae itsiata yajava.



Nexata bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonae Jesúsjavabelia.

<sup>11</sup> Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenene abaxë daxitajivi apo yapëtae. Baitsi ra saicaya pamonaepo tajajivi, tsipaebajë livaisianë ecomparacióncuenia.

<sup>12</sup> Bajaraxuata nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanjë pinijicuene taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatabëcuenecopatsiyaniva Diosojavabelia pibisiacuene pexanaeconomy Dioso pevecuaajibiaexanaeyanivatsi, jai Jesús.

*Pacuenia Jesús yapëtaeyaexana pijajivi, itsamonaeyajava, pajamatabëcuene xaina palivaisi tsipaeba peubinë pelivaisicuenia yabara pelivaisi (Mt 13.18-23; Lc 8.11-15)*

<sup>13</sup> Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë

pacatsipaebijitsiatsi comparacióncuenia? jai Jesús pijajivijavabelia.

<sup>14</sup> Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. <sup>15</sup> Pacuenia itsi pabita peubixu, paxu othopa pabi tuatuajëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. <sup>16</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. <sup>17</sup> Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi,

itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtavanapae. <sup>18</sup> Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. <sup>19</sup> Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. <sup>20</sup> Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

*Pacuenia Jesús pijajivi livaisi tsipaeba lámparabë pelivaisicuenia yabara pelivaisi  
(Lc 8.16-18)*

<sup>21</sup> Jesús icatsia jumaitsi doce ponēbeje pijajivi-javabelia, itsamonaejavabelia ata:

—Itsajivi ata lámparabē pitanojotsicujinae apo etsi cajoniēñēalia. Apo etsi cama bēxēpanalia ata. Jume baja cajena. Biji rajane athēbēyo etsia daxitaboēñē pitayotecaenexa. <sup>22</sup> Bajara pijinia itsi palivaisianē tsipaebaponajē comparacióncuenia daxitajivi picani peyapētaenexa. Najumematayatsia apo tsipaebaponaenē. Itsamonaē nejumetae ata, aeconoxae abaxē apo nejumeyapētae pajamatabēcuene xaina tatsipaebilivaisianē. Itsiata itsamatacabi, bexēajavabelia, daxitajivi nejumeyapētaena pajamatabēcuene xaina palivaisianē comparacióncuenia tsipaebaponajē. <sup>23</sup> Pajivi jamatabēnejumeyapētane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

<sup>24</sup> Icatsia Jesús jumaitsi bajarapamonaejavabelia:

—Panejumecanaējēre patacatsipaebilivaisi. Itsamonaē ata itsa pacatsipaebiana, bajarapamonaē ata pajumecanaējētsianame papecatsipaebilivaisi. Palivaisivajēto panejumecanaējētsianame, nexata bajarapalivaisivajēto pajumeyapētaename. Itsiata icatsia pematatsēñēa bajarapitsilivaisivajēto Dioso pacayapētaeyaexanaena. <sup>25</sup> Pajivi xaniavaetsia nejumeyapētane patacatsipaebilivaisi, bajarapajivi icatsia itsalivaisi pematatsēñēa Dioso jumeyapētaeyaexanaenatsi. Itsiata pajivi apo jitsipae pematatsēñēa pejumeyapētaeponaenexa, bajarapajivi palivaisiyovajēto picani jumeyapētane, nacofēñētsiana, jai Jesús.

*Pacuenia peubixu pejuvicujinae, Dioso pesaëta vitsaba yabara pelivaisi*

<sup>26</sup> Jesús icatsia jivi comparacióncuenia livaisi tsi-paeba Dioso pijajivi pevetsicueene yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayabajaranajetaruca. <sup>27</sup> Peubinë peubicujinae vemaxëmajitabiaba meravivi canacujitsia. Naëcotabiaba matababita. Bajarapacuenia panepapona matababianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuatata juva. <sup>28</sup> Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. <sup>29</sup> Itsa baja yaniona peubijava, penotsivi pona penotsinexa. Tsi-paji baja penotsimatababinexa tocopiapatatsi, jai Jesús jivijavabelia.

*Pacuenia mostazaxutoyo pejuvicujinae, mostazanae bepimia vitsaba yabara pelivaisi*

*(Mt 13.31-32; Lc 13.18-19)*

<sup>30-31</sup> Jesús icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepimia ayaibitsaëto-xaneto penaexanaejavanexa? Jivi meta peyapëtaenexa ayaibitsaëto-xaneto bepimia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepimia vitsaba mostazanae, bajara

pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecua. <sup>32</sup> Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubi-naenë matatoxenetsia. Nexata baratsui ata pe-matapenanë exana mostazanaemaxërananëjavata. Bajara pijinia itsane jivi ata. Bepijia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

*Pacuenia Jesús jivi livaisi tsipaebabiaba  
ëcomparacióncuenia yabara pelivaisi  
(Mt 13.34-35)*

<sup>33</sup> Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. <sup>34</sup> Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

*Pacuenia Jesús itaveta joviboxaneto, malataca  
yajava, piayajavami yabara pelivaisi  
(Mt 8.23-27; Lc 8.22-25)*

<sup>35</sup> Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

<sup>36</sup> Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pēnaponatsi itsajeranēta.

<sup>37</sup> Nexata pinijijoviboxaneto jemata najetaruca. Nexata malataca jera ēnēaberena mera epabajarabapona. Nexata baja jera ēnēaberena mera vēnēcaponā.

<sup>38</sup> Jesús itsiata majitanuca jamatejema jeratabufejavavetsina. Namatabēxēyaētānuca penamatabēxēyaētabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenē, vaxaitsimi rabaja yaothopae-natsi! ¿Apo jamatabēcuenebējamē tsaja? jai Jesús pijajivi.

<sup>39</sup> Nexata Jesús pemajitanucaenēmi naēcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. <sup>40</sup> Nexata Jesús jumaitsi pijajivi-javabelia:

—¿Detsa xuajitsia bitso pajunavame? ¿Tsipaji apo payapētaemē Dioso papecaevetsijava? jai Jesús.

<sup>41</sup> Nexata Jesús pijajivi najunaviaca bajara-pacuenē petaexae. Ēpamonae najumaitsi:

—¿De meta tsipaji maponēje? ¡Itaveta jovibo, malataca ata! ¡Jumecovēnētatsi baja rovia maponēje! ¡Nexata baja jovibo, malataca yajava, ajibi tsaxuabi! najai Jesús pijajivi.

## 5

*Pacuenia pebi, dovathivi peyajavaponapon-aenë, Jesús vecuacapitsapa Gerasa nacuata yabara pelivaisi*

*(Mt 8.28-34; Lc 8.26-39)*

<sup>1</sup> Jesús pijajivi barëpata pucaxaneto itsapanabelia, Gerasa nacuayabelia. <sup>2</sup> Nexata Jesús jerajavavetsina nonotajuna. Pebi dovathivi peyajavaponapon-aenë, kujitabarenatsi jivimëthëanëjavaverena. <sup>3</sup> Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. <sup>4</sup> Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxababiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. <sup>5</sup> Bajaraponë petsutonëjava, jivi petëpaevi pemëthëcajava, matabijebi, meravijebi yajava, ponaponabiaba. Vavajai tsabiabaponaponae. Ibotonëjavabelia natsaquibajarababiabaponapona. <sup>6</sup> Bajaraponë itsa taetaba Jesús penajetarucäjava, nexata tajëverena kujinaeponarena Jesúsjavaberena. Jesús pitabarata pematocabëta nucajunua. <sup>7</sup> Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata.



Nejamatabëcuenebejiobitsipame, jai dovathivi peyajavaponaponaenë Jesúsjavabelia.

<sup>8</sup> Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesús.

<sup>9</sup> Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaenë navënëpaeba.

—Tavënë raja Legión. Tsipaji raja bitso paayaibitsaëtoxanetonë, jai dovathivi peyajavaponaponaenë.

<sup>10</sup> Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecua. <sup>11</sup> Nexata bajarajota, imoxoyo petsutojavata, marranobitsaëtoxaneto xaevanapa.

<sup>12</sup> Dovathivi bitso vajëca Jesúsjavabelia.

—Paneitorobare marranobitsaëtoxanetojavabelia. Panetocopare patajonenexa bajara pamarranobitsaëtoxanetojavabelia, jai dovathivi.

<sup>13</sup> Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëtoxanetojavabelia dovathivi junua. Bajara pamarranobitsaëtoxaneto jinavanapa anijamilbeje ponëbeje. Nexata daxita marranobitsaëtoxanetomi cujinaeyeca.

Pucaxaneto itapajanituareca othopareca. Nexata daxita marranobitsaëtoxanetomi meneta bubuna.

<sup>14</sup> Bajara pamarranobitsaëtoxanetomi pevetavanapaevi rēcēpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penae-vijavabelia ata. Nexata jivi ponarena petaenexa bajarapacuene. <sup>15</sup> Nexata dovathivi peyjavaponaponaeñemi bajarapamonae taeyeta Jesús pemuxuneneta. Bajaraponē penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. <sup>16</sup> Pamonaē cuenetanetsi Jesús pejamatejemayaexanaejava dovathivi peyjavaponaponaeñemi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxanetojavabelia. <sup>17</sup> Nexata Gerasa nacuapijivi jumaitsi Jesúsjavabelia:

—Pexaniacuene pacavajētatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

<sup>18</sup> Jesús baja itsa runareca jera enēabereca, ponē dovathivi peyjavaponaponaeñemi, bitso picani navajēca Jesús pepēta penaponaeñexa. <sup>19</sup> Itsiata Jesús apo jejai. Jumaitsi bajaraponējavabelia:

—Ponare nijaboyabelia. Nijamonae tsipae-bare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyjavaponaponaeñemijavabelia.

<sup>20</sup> Nexata baja dovathivi peyjavaponaponaeñemi pona. Taxuxuaba penavajunupaebijava papinijicuene Jesús exanatsi. Bajaraponē

navajunupaebapona Decápolisvënë nacuajava. Decápolisvënë nacuata eca diez patomarabeje. Daxitajivi jamatabëcuenenabenajaca ita jumetanetsi bajaraponë penavajunupaebapon-aejava.

*Pacuenia Jesús copiaya namutoepatota jamatejemayaexana piavítaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi*

*(Mt 9.18-26; Lc 8.40-56)*

<sup>21</sup> Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxaneto Jesús matatoyoronatsi. <sup>22</sup> Nexata bajarajota napatajopa Jairovënë. Bajaraponë judíovi penacaetuatabiabilo pevetsiviyajuvënë. Jairo ita taetaba Jesús, nexata Jairo pematabacabëta yaiyataeya Jesús pitabarata nucajunua.

<sup>23</sup> Pinijicuenia Jairo vajëta Jesúsjavabelia. Jumaitsi: —Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

<sup>24</sup> Jejai Jesús. Jesús nexata napona Jairo pepëta. Nexata jivibitsaëtoxaneto Jesús pepënaponaevitsi matatoyorotsia cënënanajetarubenatsi.

<sup>25</sup> Bajarapajivibitsaëtoxaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. <sup>26</sup> Bitso nexata bajarapova bejiobi pexainaecuene yabara pevaëbivitsi pejamatabëcueneta. Tsipaji belia

daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitaneuene. Biji caranata pevajënaeyabelia capunaponatsi piavitaneuene.  
<sup>27</sup> Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëtoxaneto tuatuajëalia. Nexata bajarapova tojayataba Jesús penaxatatsijava.  
<sup>28</sup> Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanejavami nevecuaajibi tsane,” jamatabëjai.  
<sup>29</sup> Nexata bajarapova ita tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane.  
<sup>30</sup> Jesús ata nayapëtane pesaëta pejamatejemayaexanaejava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

<sup>31</sup> Nexata Jesús pijajivi jumaitsitsi:

—Taneme rabaja jivibitsaëtoxaneto pecacënënanajetarubenaejava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

<sup>32</sup> Jesús naëcobaruta daxitajivijava petaenexa pajivi tojayatabatsi penaxatatsijava.  
<sup>33</sup> Nexata bajarapova neconecojai tsanucæ pecajunavi penayapëtaexæ Jesús pejamatejemayaexanaejavatsi. Nexata bajarapova najetabarena Jesús

pitabarayaberena. Pematabacabëta nucajunua. Nexata daxita pacuene exana, bajarapova tsipaeba Jesúsjavabelia. <sup>34</sup> Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanëjavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

<sup>35</sup> Bajarapacuenia Jesús pejumaitsanucaejavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

<sup>36</sup> Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

<sup>37</sup> Nexata Jesús, pajivibitsaëtoخانeto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje.

<sup>38</sup> Itsa baja Jesús palia Jairo pijaboyabelia, tane jivibitsaëto pinijijumeta pematanueyabijava petëpaevayo. <sup>39</sup> Jesús itsa joneya boyalia, jumaitsi bajarapamonaejavabelia:

—Pëtsa bitso pamatanueyabame. Pejanava raja apo tēpae. Saya raja majitanuca, jai Jesús tsi-paji yapētane Jesús píasaëyaexanaejavanexa bajara-povayo.

<sup>40</sup> Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petēpaevayo boca, Jesús barějoneya caejiviyobeje saya. Jesús saya barějoneya mapamatabëxëyoje: petēpaevayo paxa, pena, Jesús pijajivi, acueyabi ponēbeje. Bajarapamatabëxëyo saya Jesús barějoneya. <sup>41</sup> Nexata Jesús petēpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsi-jume: “Pejanava, nonotapunare,” pejajume.

<sup>42</sup> Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuenene itsa tane.

<sup>43</sup> Nexata Jesús pinijicuenia jumaitsi:

—Pëtsa itsajivi ata patsipaebame mapacueneye, jai Jesús.

Bajaraxuacujinae Jesús jumaitsi pejanavayo pe-najavabelia:

—Nexēnatovayo pexaejava rajure, jai.

## 6

*Pacuenia Jesús naviata pijanacuayabelia, Nazaret tomarabelia, yabara pelivaisi*

*(Mt 13.53-58; Lc 4.16-30)*

<sup>1</sup> Jesús baja, pijajivi yajava, pona Capernaum tomaravecua. Naviata pijanacuayabelia,

pevitsabitomarabelia. <sup>2</sup> Judíovi penacuer-  
aevetsimatacabita Jesús taxuxuaba jivi livaisi  
petsipaebijava judíovi penacaetuatabiabibota.  
Ayaibitsaëtoxaneto pejumetaevitsi sivaja-  
matabëcuenenabenajacatsi. Nexata bajarapamonae  
Jesús jamatabëcueneaebiatanetsi. Bajarapamonae  
Jesús yabara najumaitsi mapacueniaje:

—¿Detsa meta verena maponë capitsapa ma-  
pajamatabëcuenelivaisije? ¿Detsa pacuenia meta  
yapëtane daxita mapacuenije? ¡Pitsipinijicuene  
maponë exanaje, vaxaitsi abaxë caeto ata apo  
taetsi! ¡Matapania matanetsije! <sup>3</sup> Maponëje vaxait-  
siyajuvënënë. Carpinteronë. María pexë nato. Ba-  
jaraponë pejuyapijivi Santiago, José, Judas, Simón.  
Papetiriavi ata vajatomarata jinavanapa, bajara-  
ponë pejuyapijivi, najai bajarapamonae Jesús  
yabara.

Nacaetomarapijivixae, bajarapamonae Jesús  
apo jumexaniataetsi. <sup>4</sup> Nexata Jesús jumaitsi  
bajarapamonaejavabelia:

—Bajara maitsabiabije. Diosojumepaebivi pro-  
fetavi itsanacuapijivi yaiyataeyabiabatsi. Itsiata  
pijanacuapijivi, pijaviriavi, pijamonae ata, apo  
yaiyataeyabiabitsi, jai Jesús.

<sup>5</sup> Nexata Jesús bajarajota jivi ayaibit-  
saëtojavabelia pinijicuene pexanaejava apo  
tsitaexanae. Tsipaji apo jumecovënëtsitsi. Saya  
caejiviyobeje piavitanevi pecobeta jayata.  
Jamatejemaya exana. <sup>6</sup> Nexata Jesús bitso  
najamatabëxaina. Tsipaji jivi apo jumecovënëtsitsi.  
Bajaraxuacujinae Jesús tsiquiritoramaraxijava  
Dioso pitorobilivaisi jivi tsipaebanajetaruca.

*Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi*

*(Mt 10.5-15; Lc 9.1-6)*

<sup>7</sup> Jesús junata pijajivi doce ponëbeje penacaetuatsinexa. Nexata Jesús pijajivi itoroba anijanëbeje tsaponae. Jesús pijajivi pecaējëpaejamatabëcuenetsi jamatabëcuenecaējëpaeyaexana dovathi peyajavajinavanapaevi pevecuacapitsapaponaenexa. <sup>8</sup> Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame panemarue ata, doro ata, palata ata. Ënaeboyo saya pacaponare. <sup>9</sup> Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. <sup>10</sup> Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajara-pabovecua papitsapaename. <sup>11</sup> Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponaname bajarapatomaravecua. Paneponaevajënae bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabi Dioso jivi naneconitsiaex-



anaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

<sup>12</sup> Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexta Jesús pijajivi jumai tsaponae jivijavabelia:

—Pacopabare baja pibisiacuene paneexanabi-abijava. Panajamatabëcuenepënëyorore Diosojavabelia, jai tsaponae.

<sup>13</sup> Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranëta. Bajarapacuenia Jesús pijajivi jamatejemayaexanapona piavitanevi.

*Pacuenia bajayata Juanpijinë jivibautisabinëmi beyaxuabatsi yabara pelivaisi*

*(Mt 14.1-12; Lc 9.7-9)*

<sup>14</sup> Herodes, Galileanacua pevetsinë. Nexata Herodes jumetane itsamonae jamatabëcuenenavëxaniabiaya pejumaitisijava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa,” pejajava itsamonae jamatabëcuenenavëxaniabiaya Jesús yabara, Herodes jumetane.

<sup>15</sup> Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonae.

<sup>16</sup> Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes itsa jumatane, Herodes ata jamatabëcuenenavëxaniabiaya jumaitsi Jesús yabara:

—Maraeta Juanpijinëmije, ponëmi bajayata xanë tajajivi vēsiucutaxuabiaexanjë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

<sup>17</sup> Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalialia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. <sup>18</sup> Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, muxujioba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

19 Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë ita ponapona penaneconitsivi pejebabiabibota, bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi.

20 Tsipaji Herodes yapëtane Juanpijinë bitso pejamatabëxanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë ita cuaicuajai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba.

21 Nexata pamatacabi Herodes najamatabënapita penaexanaematacabi, najamatabëxaina pexaniafiesta pexanaenexa. Bajarapafiestajava Herodes junata pijaboy-  
 aberena jivi ayaibitsaëtoxaneto penabaninexa. Junata Herodes pijajivi, pamonae toevetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toyapëxanepanatsi Juanpijinë pebeyaxuabiaexanaenexatsi.

22 Herodíasva toyapëxanepanatsi tsipaji pexënatoyo joneya Herodes pejunatsivi pebarënanabecaejavalialia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejionëyo peyavajibijava. Nexata Herodes najumecapanepaeya pexaniajaijumeta jumaitsi pejionëyojavabelia:

—Nevajëre xua jitsipame. Carajutsianatsi raja.

23 Pacuenejava nevajëtsianame, carajutsianatsi.

Itsa nevajëtsianame taneevetsiaexanaenacua ata, tuatuajëjava carajutsianatsi, jai Herodes najumecapanepaeya pejionëyojavabelia.

<sup>24</sup> Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaitsi:

—Juan jivibautisabinë pematabocoto vajëre, jai.

<sup>25</sup> Nexata bepìjia bajarapovayo jopajoneya Herodes peecaejavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

<sup>26</sup> Nexata Herodes pinijicuenia bejamatabëjiohi tsanajetsireca. Herodes nexata acuenebi: “Jume,” pejajjava. Tsipaji baja Herodes najumecapanepaeya jumaitsi pejionëyojavabelia pexaniajaijumeta daxita pejunatsivi pitabarata.

<sup>27</sup> Nexata Herodes bepìjia itoroba vajabitsaënë petocarenanexatsi Juan pematabocoto.

<sup>28</sup> Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

<sup>29</sup> Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

*Pacuenia Jesús pexaejava rajuta cinco mil ponëbeje yabara pelivaisi*

*(Mt 14.13-21; Lc 9.10-17; Jn 6.1-14)*

<sup>30</sup> Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. <sup>31</sup> Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoxanetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënabaninexa, apo cuenecaëjöpabiabitsi. <sup>32</sup> Nexata Jesús ëpijajivi jerata yajavapona itsabelia jivi ajibi. <sup>33</sup> Itsiata jivi ayaibitsaëtoxaneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae. <sup>34</sup> Itsa baja Jesúsbana nonobajunaya jeravecua, Jesús tane jivibitsaëtoxaneto. Nexata Jesús bajarapamonae itaxutobejiobiatane. Nexata Jesús bajarapamonae sivajamatabëjumaiti mapacueniaje:

—Pacuenia baitsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia. <sup>35</sup> Itsa baja bitso caniviyotsia,

Jesús pijajivi cujibarenatsi. Jumaitsitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae.  
<sup>36</sup> Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

<sup>37</sup> Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaenajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

<sup>38</sup> Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

<sup>39</sup> Nexata Jesús itoroba daxitajivi penaenexa ponajavata. <sup>40</sup> Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona. <sup>41</sup> Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava.

Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. <sup>42</sup> Daxita xaniavaetsia nabane. <sup>43</sup> Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. <sup>44</sup> Pamona pexaejava xane, ayaibitsaëtoxaneto. Itsiata ëpebijivi namataëjëtatsi cinco mil ponëbeje.

*Pacuenia Jesús mene itaboxoya najetaruca yabara pelivaisi*

*(Mt 14.22-27; Jn 6.16-21)*

<sup>45</sup> Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota. <sup>46</sup> Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia. <sup>47</sup> Itsa baja bitso meravi, Jesús pijajivi pucaxaneto itapavecua tajë baja yanajetarubenalia. Jesús abaxë bajarapaepatota caenë nacopatanucarena pucaxanetoitapatarena. <sup>48</sup> Nexata Jesús tane pijajivi petoayapëbejjavatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matcabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Rovia picani xenetsijitsia.

49 Jesús pijajivi itsa tanetsi mene itaboxoya penajetarucaejala, Jesús pijajivi jamatabëjumaitsi:  
—¡Petëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta. 50 Tsipaji daxita Jesús pijajivi tane bajarapacuenia penajetarucaejala. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

51 Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejala. 52 Jesús baja picani pijajivi copiaya tane, pan tsiquirijavayomi ata, jivibitsaëttoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuenene pexanaenexa. Abaxë bajarapamonae ajamatabëcuenetaja.

*Pacuenia Jesús jamatejemayaexana piavitanevi  
Genesaret nacuata yabara pelivaisi*

*(Mt 14.34-36)*

53 Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. 54 Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesús cuene. 55 Nexata Jesús pepatsijava penatsipaebinxaxa, navajunucacujinaejinaruta daxita bonëjava. Nexata piavitanevi pijacamaxita



yavëtarapatatsi itsajota jivi jumetane Jesús pepatsijava. <sup>56</sup> Jesús pata tsiquiritoraraxijava, pinijitoraranëjava ata, tomarapënëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaë Jesús penaxatatsijavacopia tojayataponatsi, jamatejema baja tsaponae piavitanejavamivecua.

## 7

*Pacuenia Jesús tsipaeba xua jivi jamatabëcuenebijiñatsi yabara pelivaisi*

*(Mt 15.1-20)*

<sup>1-4</sup> Daxita judíovi catsiteca pijasalinaivimi pijacuene. Judíoviyajuvënëvi, pamonaë fariseovi naexana, bajarapamonaë bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonaë pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinaë,

bajarapamonae pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae tane Jesús pijajivi judíovi pijasalinaicuenia anijatonë napënanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia.  
<sup>5</sup> Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

<sup>6</sup> Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isaíaspijinë peyaquinaelivaisita jumaitsi mapacueniaje:

Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. <sup>7</sup> Saya baitsi bajarapamonae pijajumaitsita tsane: “Pacajitsipatsi,” nejai itajara tsane. Itsiata apo xaniajai tsane.

Bajarapamonae saya jivi tsipaebaponaena pejamatabëcuenepijilivaisi. Pepo taitorobilivaisi apo tsipaebi tsane, jai tajëvelia Dioso pejumaitsijava paxamë yabara Isaiaspijinë peyaquinaelivaisita, jai Jesús bajarapamonaejavabelia.

<sup>8</sup> Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. <sup>9</sup> Apo pajumecovënëtsimë Dioso pitorobilivaisi vajasalinaivi pijacuene panecat-sitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuenes raja exanajë,” pajamatabëjamë tsabiabi.

<sup>10</sup> Bajayata Dioso najumecopata Moiséspijinëta. Bajarapalivaisi jumaitsi: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. <sup>11-12</sup> Itsiata baitsi jane paxamë jivi pamuxubijiapenatabiabame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita

bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje, jamë tsane neyavenon-aeyaniva,” pajamë tsabiabi jivijavabelia. <sup>13</sup> Nexata caranata Dioso pejumaitsijume: “Axa yaiyataema. Ena ata yaiyataema,” pejajume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

<sup>14</sup> Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë.

<sup>15</sup> Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovecsina, xua ata pibisiacuenia cuaicuaijai, bajara baitsi jane xua jivi bajamatabëcuenebijianatsi. <sup>16</sup> Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

<sup>17</sup> Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. <sup>18</sup> Nexata Jesús jumaitsi pijajivijavabelia:

—¿Paxamë ata tsarovia abaxë apo panenjumeyapëtaemë? Daxitacuenë raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi. <sup>19</sup> Tsipaji raja jivi pexaejava apo tsijamatabëëthëjonetsi.

Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaexanaenexa pacuenia daxitacuene jivi pexaejava xae ata, apo pibisiacuene.

<sup>20</sup> Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi.

<sup>21</sup> Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa. Pitsapa jivitonë pebeyaxuabijamatabëcuenenexa.

<sup>22</sup> Pitsapa penacobetoxotsijamatabëcuenenexa. Pitsapa itsamonae pecobecovë penaxainaeyabijamatabëcuenenexa. Pitsapa piacujirubejijamatabëcuenenexa. Pitsapa itsamonaejavabelia peyamaxëitojorobijamatabëcuenenexa. Pitsapa itsamonae pexainaecuene pecobecaëbijamatabëcuenenexa. Pitsapa

itsajivi pibisiacuena pebaracuaicuaijai jamatabëcuenenexa. Pitsapa ayaijamatabëcuenejivi penataejamatabëcuenenexa. Pitsapa saya jema peponaponaejamatabëcuenenexa.

<sup>23</sup> Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuene jivi jamatabëcuenebijianatsi, jai Jesús pijajivijavabelia.

*Pacuenia Jesús itsanacuapijiva pexënatoyo toja-  
matejemayaexana yabara pelivaisi*

*(Mt 15.21-28)*

<sup>24</sup> Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava.

<sup>25</sup> Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yaiyataeya Jesús pitabarata pematabacabëta nucajunua. Bajarapova pexënatoyo dovathi yajavaponapona.

<sup>26</sup> Bajarapova sirofeniciaviriava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

<sup>27</sup> Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tara-jutsinexa avirixijavabelia, bajara itsinë tsipae, jai Jesús bajarapovajavabelia.

<sup>28</sup> Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca,

banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>29</sup> Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

<sup>30</sup> Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

*Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi*

<sup>31</sup> Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia.

<sup>32</sup> Bajarajota jivi tocapatatsi siyanë, bitso apo pejumetaenë, piajumecëcënë. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonae.

<sup>33</sup> Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. <sup>34</sup> Nexata Jesús

athëbëa benaëcotsia. Jesús athëbë venajumalixu-abica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitsijume: “¡Muxuvojorucaremelia!” pejaijume.

<sup>35</sup> Bajarapacuenia Jesús pejumaitsijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. <sup>36</sup> Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia. <sup>37</sup> Nexata pamonaë jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijajava, cuaicuaijaiyaexanapona xaniavaetsia, jai bajarapamonae Jesús yabara.

## 8

*Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)*



<sup>1</sup> Itsamatacabi Jesús jivibitsaëtoxaneto muxunanacaetuatatsi. Nexata bajarapamonae penabainexa, bajarajota pexaejava apo xinae. Nexata Jesús junata pijajivi. Jesús jumaitsi pijajivijavabelia mapacueniaje:

<sup>2</sup>—Netsitabejiobi baja rovia mapamonaeje. Tsi-paji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. <sup>3</sup> Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsi-paji raja itsamonae pata tajëverena, jai Jesús pijajivijavabelia.

<sup>4</sup> Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsi-paji itsajivi ata pijabo apo xinae, jai Jesús pijajivi.

<sup>5</sup> Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

<sup>6</sup> Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicacaepan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa.

<sup>7</sup> Dujuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Paneraju-tame dujuainëxi, jai.

Nexata icatsia pijajivi itoroba petsicobet-sanaenexa daxitajivi bajarapadujuainëxi. <sup>8</sup> Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. <sup>9</sup> Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. <sup>10</sup> Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuyabelia.

*Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi*

*(Mt 16.1-4; Lc 12.54-56)*

<sup>11</sup> Fariseovi Jesúsjavaberena pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

<sup>12</sup> Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata

apo pacatsitaexanaetsi tsane pinijicue  
taexanaejava, jai Jesús.

<sup>13</sup> Nexata baja Jesús bajarapamonae  
vecuapona. Icatsia runareca jera ënëabereca.  
Pucaxaneto itsapanabelia baja Jesús pona.

*Pacuenia Jesús pijajivi muxujioba fariseovi pet-  
sipaebilivaisi pejumecovënëtsiyaniva yabara peliv-  
aisi*

*(Mt 16.5-12)*

<sup>14</sup> Jesús pijajivi nacofënëta pamarue. Nexata  
saya caepanbëyo capona jerata. <sup>15</sup> Nexata Jesús pi-  
jajivi muxujioba pejumecovënëtsiyaniva fariseovi  
itsa tsipaebatsi saicayacuenia Dioso pejumeliv-  
aisivecua. Jesús jumaitsi pijajivijavabelia ma-  
pacueniaje:

—Panejumetaema. Xania panayajivitaema  
fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsi-  
paebilivaisi, nacuaevetsinë ata, Herodes, petsi-  
paebilivaisi, Jesús pijajivi pejumecovënëtsiyaniva.

<sup>16</sup> Itsiata Jesús pijajivi apo jumeyapëtaetsi. Ba-  
jaraxuata Jesús pijajivi nabarëcuaicuaijai bajara-  
pacuenia Jesús pejumaitsijume yabara. Jesús pi-  
jajivi najumaitsi:

—Jesús nacajumaitsi: “Xania panayajivitaema  
fariseovi pijalevadura,” nacajai. Baja raeta pacue-  
nia Jesús nacajumaitsi pan apo vajacaponaeaxae,  
najai Jesús pijajivi.

<sup>17</sup> Jesús pijajivi jamatabëcueneyapëtane  
bajarapacuenia jamatabëcuenenavëxaniabiaya  
penajumaitsijava levadura yabara. Nexata Jesús  
jumaitsi pijajivijavabelia:

—¿Detsa xuajitsia panajumaitsimë: “Baja raeta pacuena Jesús nacajumaitsi pan apo vajacapon-aexae,” panajamë? Paxamë abaxë apo panejumeyapëtaemë xua yabara pacajumaitsitsi. Pajamatabëcuenetajamë bitso. <sup>18</sup> Pan yabara raja apo pacajumaitsitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënapitsimë tsipaji pacuena exanajë pamatacabi pan namatavenonatsi? <sup>19</sup> Pacujinae epatsicacajë cinco papanbëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

<sup>20</sup> Jesús icatsia jumaitsi:

—Pacujinae epatsicacajë siete papanëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

<sup>21</sup> Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsijava? Xanë pacajumaitsitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi panejumecovënëtsiyaniva fariseovi petsipaebilivaisi, panejumecovënëtsiyaniva nacuaevetsinë ata Herodes. Tsipaji bajarapamonae pacatsipaebiana

saicayacuenia Dioso pejumelivaisivecua, jai Jesús pijajivijavabelia.

*Pacuenia Jesús itaxutoxaniavaeta bitso pitaxutotsēcēnaenē, apo petaenē tsiquirijavayo ata, yabara pelivaisi*

<sup>22</sup> Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsēcēnaenē, apo petaenē. Pinijicuenia vajēcatsi Jesús pitaxutojayatsinexa bajaraponē pitaxutoxanepanaenexa. <sup>23</sup> Nexata Jesús cobepita. Barēpona pesaicaeyojavabelia, tomarapēnyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaējēpa tsabaja netaejava? jai Jesús.

<sup>24</sup> Nexata bajaraponē naēcota. Jumaitsi:

—Taniji pebijivi pejinavanapaejava. Itsiata saya benetsita naejavanē, jai bajaraponē.

<sup>25</sup> Nexata icatsia Jesús itaxutojayata. Bajara jane xaniavaetsia naitaxutobabatsiaya naēcota. Itaxutoxanepana jane baja. Xaniavaetsia baja tane.

<sup>26</sup> Nexata Jesús jumaitsi bajaraponējavabelia:

—Naviare nijaboyabelia. Pētsa abaxē poname tomarabelia. Pētsa paebame itsajivijavabelia ata pacuene caexanatsi, jai Jesús.

*Pacuenia Pedro jumaitsi Jesúsjavabelia: “¡Xamē raja Cristomē! jai yabara pelivaisi*

*(Mt 16.13-20; Lc 9.18-21)*

<sup>27</sup> Jesús, pijajivi yajava, najetaruca. Pona pepatsinexa Cesarea de Filipovēnē tomarajumav-erena penaetomaraxijavabelia. Namutua abaxē

penajetarubenaevavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>28</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënë icatsia asaë,” jai tsabiabi xamë yabara, jai Jesús pijajivi.

<sup>29</sup> Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

<sup>30</sup> Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papabame. “Cristo raja,” pajamë pëtsa xanë yabara, jai Jesús.

*Pacuenia Jesús tajëvelia navajunupaeba pebeyaxuabijavanexatsi yabara pelivaisi*

*(Mt 16.21-28; Lc 9.22-27)*

<sup>31</sup> Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueni-aje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivínua, judíovi pecujarubivínua, apo nejumecovënëtsi tsane Cristonëcuenenë. Nexata bitso nebejioviaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matakabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>32</sup> Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuaijamë netëpaejavanexa yabara, jai Pedro Jesúsjavabelia.

<sup>33</sup> Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucæ Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

<sup>34</sup> Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponaponae taitorobicuenia. Najamatabëcueneveretsinua bejioviaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena. <sup>35</sup> Pajivi

exanaponapona penatojitsipaecuenia, apo xainae tsane matabi apo peverevereceaeva. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetana, bajarapajivi xainaena matabi apo peverevereceaeva. <sup>36</sup> Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xinae ata mapanacuapijicueneje, itsiata nacuerata. Tsipaji pexinaecuene apo capanepae tsanetsi Diosojavelia. <sup>37</sup> Tsipaji acuenebi tsane itsajivi ata pematamotsinexa penaxuabiyaniva Diosovecua. <sup>38</sup> Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavelia. Bajarapajivi vënëlivaisicauranë tsane pamatacabi icatsia patsianicajë. Baitsi pamatacabi xanë, Daxitajivi Pematapijinënë, ángelevi yajava, patsianicajë, pamatacabi yajavapatsianicajënuu taxa Dioso pijapenivenivenaecotia, jai Jesús pijajivijavelia.

## 9

<sup>1</sup> Icatsia Jesús jumaitsi jivijavelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane



Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabēcuenesaēta, jai Jesús jivijavabelia.

*Pacuenia Jesús caepatoyo perabēnivenivenataba yabara pelivaisi*

*(Mt 17.1-13; Lc 9.28-36)*

<sup>2</sup> Jesús petēpaejavanexa tajēvelia penava-junupaebicujinae, seis pamatacabibejecujinae, Jesús pijajivi, acueyabi ponēbeje, barēpona pinijitsutoxanetojumabetsia. Jesús barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya pinijit-sutoxanetojumabetsia. Nexata petsutojumatatsia Jesús perabēnivenivena bajarapamonae pitabarata. <sup>3</sup> Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caējēpaetsi bajarapacuenia peniojaiyaexanaenexa. <sup>4</sup> Jesús pijajivi bajarajota tane jemata penaitajētsijava bajayata petēpaenēmibeje, Elíaspijinēbeje Moiséspijinēbeje. Jesús barēcuaicuaijaitsi bajaraponēbeje. <sup>5</sup> Nexata Pedro jumaitsi Jesúsjavabelia mapacueniaje:

—¡Patajatuxanenē, pijacuaxae panebarēponame! Pacatoexanaenatsi acueyabi pabobērēto beje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

<sup>6</sup> Bajarapacuenia Pedro jumaitsi Jesúsjavabelia canaējētsinejeva. Tsipaji bitso bajarapamonae najunaviaca. Nexata apo yapētae pacuenia jumaitsijsia. <sup>7</sup> Nexata daxita bajarapamonae

pematatsënëvetsica itarërëbo mataacataxuabatsi. Nexata bajarapamonae jumetane bajarapaitarërëbojavavetsica Dioso pejumaitsijava.

—Mara ponë taxënato, tasivanëje. Panamuxu-naevere bajaraponë, jaitsica Dioso Jesús pijajivijavabelia.

<sup>8</sup> Bajarajota bajarapamonae itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

<sup>9</sup> Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup> Bajarapamonae, acueyabi ponëbeje, jume-covënëta pejumaitsicueniatsi. Itsiata ëpamonae nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonae.

<sup>11</sup> Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judíovi pecu-jarubivi jumai tsabiabi: “Bajayata ponëmi pon-aponna, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itoro-bijitsiatsica pepo vajanacacapanepaenënexa jane baja,” jai tsabiabi? jai Jesús pijajivi Jesúsjavabelia.

12 Nexata Jesús jumaitsi pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinē tavajēnaeya jivi jamatabēcuenexanetanajetaruca. Xanē, Daxitajivi Pematapijinēnē, athēbēvetsica Dioso nitoroba jivi tacapanepaenexa. Nexata xanē yabara tajēvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanē yabara tajēvelia Dioso pejumelivaisibaxutota, jai Jesús pijajivijavabelia.

13 Jesús icatsia jumaitsi pijajivijavabelia Juanpijinēmi yabara:

—Xaniajanē pacuenia pacatsipaebijitsiatsi. Elíaspijinē rabaja patajopa. Pepatsicujinae baja exanatsi daxita pacuenia jamatabēexanatsi. Nexata exanatsi pacuenia baja cajena Dioso pejumelivaisibaxutota tajēvelia jumaitsi bajaraponēmi yabara, jai Jesús pijajivijavabelia Juanpijinēmi yabara.

*Pacuenia Jesús jamatejemayaexana pejevaxinē,  
dovathi peyajavaponaponaenē, yabara pelivaisi  
(Mt 17.14-21; Lc 9.37-43)*

14 Jesús pijajivi, acueyabi ponēbeje, petsutojumabetsia pebarēponaecujinae, icatsia barēnaviatsica. Itsamonae Jesús pijajivi pepuenetsivijavabetsica, barēnaviatsica. Nexata Jesús tane pijajivi jivibitsaētoxoneto pevajēnae

pematatoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. <sup>15</sup> Nexata bajarapamonae itsa taerécëpa Jesús, daxita jamatabëcuenebarëyaya cujinaeyeca Jesúsjavabelia pebajacobinexatsi Jesús. <sup>16</sup> Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

<sup>17</sup> Caenë bajarapajivi bitsaëttoxanetoyajuvënënë jumaitsi Jesúsjavabelia:

—Jesús, mara picani taxënatonëyo, dovathi peyajavaponaponaenëyo, catocanajetarucatsije. Maponëyoje dovathi apo netonatsipaebiaex-anaetsi. <sup>18</sup> Itsa raja dovathi vaetababiabatsi, irata xuababiabatsi. Nexata bajarajota pecuibothamu tsabiabi. Vonoquirairajainua tsabiabi. Daxitanëyo aperabëbaba tsatababiabireca. Picani raja nijajivijavabelia jumaitsinë: “Panetovecuacapitsapare dovathi,” janë. Itsiata bajarapamonae apo caëjëpaetsi tanetovecuacapitsapaenexa, jai bajaraponë Jesúsjavabelia.

<sup>19</sup> Jesús nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecejëpae pejevaxinë panevecuacapitsapaenexa dovathi. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatabëcuenesaënë tsaponaponaë tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

<sup>20</sup> Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë tēpajoneyaexanatsi. Irata xuabatsi pejevaxinë. Nexata pejevaxinë natorenaba irata. Pethamu pitsapa pecuibuatsina. <sup>21</sup> Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxuabicujinaetsi mapacueje? jai Jesús.

Nexata pejevaxinë paxa jumaitsi:

—Penacuetojavaveliacujinae cajena taxuxuabatsi. <sup>22</sup> Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamē itsa cacaējēpa itsacuenia ata taneyavenonaenexamē, ¡nitaxutotsoniataema! ¡Neyavenonare! jai pejevaxinë paxa Jesúsjavabelia.

<sup>23</sup> Nexata Jesús jumaitsi pejevaxinë paxajavabelia:

—Pajivi jumecovēnēta Dioso peyavenonaejavanaxatsi, bajarapajivi Dioso yavenonatsi daxita xua namatavenona, jai Jesús.

<sup>24</sup> Nexata pejevaxinë paxa aējai. Jumaitsi:

—¡Jumecovēnētajē baja cajena! ¡Neyavenonare bitso orijibia tajumecovēnētsinexa! jai bajaraponē Jesúsjavabelia.

<sup>25</sup> Nexata Jesús itsa tane jivibitsaētoxfaneto penacaetuataponaejava Jesúsjavaberena, nexata Jesús itaveta dovathi. Jumaitsi:

—Dovathi, xamē pejevaxinë apo nenatsipaebi-aexanaenē. Apo nejumetaeyaexanaenēnuā. Xanē caitavetatsi. Pitsapare mapapejevaxinëvecuaje. Pētsa baja icatsia junuame matavējēa maponēyojavaberenaje, jai Jesús dovathijavabelia.

26 Nexata dovathi pejevaxinë icatsia aējaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetēpaenēyo. Nexata itsamonaē bajarajota jumaitsi:

—Pejevaxinë rabaja tēpa, jai bajarapamonae.

27 Nexata Jesús cobepita pejevaxinë. Cobe-vaetabiaya yotsina. Nexata pejevaxinë nonotabapuna.

28 Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanē apo panecaējēpae patavecuacapitsapaenexa dovathi? jai Jesús pijajivi.

29 Nexata Jesús jumaitsi pijajivijavabelia:

—Mara paviria dovathije apo jitsipae pepit-sapaejavaje. Matapania panexaejava apo pax-aemē tsipae panevajētsinexa asaēyata Diosojavabelia panecapitsapaenexa dovathi, pitsapaejit-sipa, jai Jesús pijajivijavabelia.

*Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi*

*(Mt 17.22-23; Lc 9.43-45)*

30 Jesús pejevaxinë dovathi pevecuacapitsapae-cujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacua-java. Jesús jitsipa pijajivi pebarēnajetarucaenexa bajaraxuayo itsajivi ata yapētaenejevatsi.

31 Tsipaji Jesús pebeyaxuabijavanexatsi, tajēvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanē, Daxitajivi Pematapijinēnē, necanajet-siana itsamonaē pecobeyabelia. Bajarapamonae

nebeyaxuabiana. Itsiata baitsi jane tanebeyaxu-abicujinae, acueyabi maticabita, icatsia asaënë tsane, jai tsaponae Jesús pijajivijavabelia.

<sup>32</sup> Itsiata pijajivi apo jumeypëtaetsi. Bajaramonae ajumeura Jesúsjavabelia peyanijobinexa bajarapalivaisi yabara.

*Pacuenia Jesús pijajivi: “¿Detsa ponë vaxaitsiyajuvënë nacavecuaayaijamatabëcuenenë bitso?” najai tsanajetarubena yabara pelivaisi (Mt 18.1-5; Lc 9.46-48)*

<sup>33</sup> Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

<sup>34</sup> Nexata Jesús pijajivi moya. Tsipaji Jesús pijajivi namutua najumaitsi tsanajetarubena:

—¿Detsa ponë vaxaitsiyajuvënë nacavecuaayaijamatabëcuenenë bitso? najai tsanajetarubena Jesús pijajivi.

<sup>35</sup> Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayaijamatabëcuenejivi penaexanaenexa daxitajivi matatoxenetsia, bajarapajivi beveliajamatabëcuenejivi natae peyavenonaenexa daxitajivi, jai Jesús pijajivijavabelia.

<sup>36</sup> Bajaraxuacujinae Jesús cobepita pejevaxinëyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

<sup>37</sup> —Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo

necopiapitsi. Ponë nitoroba, neyjavacopiapita, jai Jesús pijajivijavabelia.

*Pacuenia Jesús jumaitsi pijajivijavabelia  
itsa vënëlivaisitane itsanë dovathi jivivecua  
pecapitsapaejava Jesús pevënëta yabara pelivaisi  
(Mt 10.42; Lc 9.49-50)*

<sup>38</sup> Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënëne. Nexata paitavetajë bajaraponë dovathi jivivecua pecapitsapaponaejava, jai Juan.

<sup>39</sup> Nexata Jesús jumaitsi Juanjavabelia:

—Pëtsa paitavetame bajaraponë. Tsipaji raja pajivi pinijicuene pexanaejava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuena.

<sup>40</sup> Tsipaji raja pajivi pibisiacuene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenejivi.

<sup>41</sup> Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

*Pacuenia Jesús pijajivi muxujioba itsajivi ata  
pibisiacuene pexanaeyaexanaeyaniva yabara peli-  
vaisi*

*(Mt 18.6-9; Lc 17.1-2)*

<sup>42</sup> Icatsia Jesús jumaitsi pijajivijavabelia:



—Pajivi pibisiacuene exanaeyaexanaejitsipa mapitsipejevaxijivixi ataje, tanejumeconvēnētsiyajuvēnjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabēxaina pibisiacuene pexanaeyaexanaenexa tanejumeconvēnētsivijavabelia, abaxē pibisiacuene exanaeyaexanaenejeva, bajarapajivi bevēsicētatsi ibotoxanetojavabelia. Nexata bajarapajivi yamaēya, ibotoxaneto yajava, bexuarecatsi pucaxaneto tuatuajēareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumeconvēnētsiviyajuvēnēvi.

<sup>43</sup> Bajaraxuata panecobeta pibisiacuene itsa paexaname, panacobecaucure. Itsiata xanepana panejonenexa cobemataxucaeya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. <sup>44</sup> Bajarajota apo tēpae oro, jivivixaevi. Isotocotia ata apo itaxupae caeto ata. <sup>45</sup> Itsa panetaxuta ata pibisiacuene paexaname, panataxucaucure. Itsiata xanepana panejonenexa taxumataxucaeya apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava.

<sup>46</sup> Bajarajota apo tēpae oro, jivivixaevi. Isotocotia ata apo itaxupae caeto ata. <sup>47</sup> Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaetitaxutojivimē

apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. <sup>48</sup> Bajarajota apo tēpae oro, jivivixaevi. Isotocotia ata apo itaxupae caeto ata.

<sup>49</sup> Dajubinē jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabēcuenexanepanaenexa, daxita Dioso pijajivi ata jamatabēcuenējēbianatsi mapanacuataje. <sup>50</sup> Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenējavayonexa ata. Bajara pijinia pacuenia paxamē ata pajamatabēcuenēitsimē tsipae Diosojavabelia, itsa apo pavecuapanepaemē tsipae papecajamatabēcuenē jētaponaejava. Nexata pajamatabēcuenesaēmēre panejamatabēcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

## 10

*Pacuenia Jesús jivi livaisi tsipaeba penacojobinē pijava pexuabiyanima yabara pelivaisi*

*(Mt 19.1-12; Lc 16.18)*

<sup>1</sup> Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaētoxaneto pata Jesúsjaverena. Nexata icatsia Jesús livaisi

tsipaeba bajarapamonae. Tsipaji baja cajena Jesús livaisi petsipaebanajetarucaenē. <sup>2</sup> Nexata fariseovi Jesús cujibarenatsi petsipaebilivaisi yabara jamatabëcueneējēbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa? jai.

<sup>3</sup> Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaïtoroba panijavajivi panexuabiyaniva? jai Jesús.

<sup>4</sup> Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabëxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabëxuaba, Moiséspijinē tocopata, jai fariseovi Jesúsjavabelia.

<sup>5</sup> Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata paneajamatabëcuenelivaisitajaxae.

<sup>6</sup> Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. <sup>7</sup> Bajaraxuata pebi itsa nacojioba pijavajavabelia, banatsata paxavecua, pena atavecua. <sup>8</sup> Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane

Dioso. <sup>9</sup> Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

<sup>10</sup> Bajaraxuacujinae Jesús pijajivi pijaepato itsa barënacopata bota, nexata Jesús pijajivi yanijobatsi bajarapacuenene yabara. <sup>11</sup> Nexata Jesús jumaitsi pijajivijavabelia:

—Ponë pijava pexuabicujinae, itsava icatsia itsa pita, bajaraponë pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxë bajaraponë pexuabiva pepo pijavacuenia totanetsi.

<sup>12</sup> Bajara pijinia itsi petiriva ata pamona pevecuanaviatsicujinae, itsanë icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanë jaita pepo pamonavecua, ponë abaxë Dioso totanetsi pamonacuenia, jai Jesús pijajivijavabelia.

*Pacuenia Jesús jumaitsi pejevaxijivixijavabelia yabara pelivaisi*

*(Mt 19.13-15; Lc 18.15-17)*

<sup>13</sup> Jesúsjavaberena itsamonae pejevaxijivixi tocapataponatsi Jesús pejayataponaenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

<sup>14</sup> Nexata Jesús itsa tane bajara pacuenia pijajivi pejumaitsijava, Jesús jamatabëcueneanaepanaxuareca. Jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. <sup>15</sup> Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Bajara pijinia pacuenia jumeabinejeva, xaniavaetsia bejumecovënëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

<sup>16</sup> Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponaе:

—Dioso xaniavaetsia caevetsiana, jai tsaponaе.

*Pacuenia pevejëato, bitso pexainaenë, cuaicuai-jai Jesúsjavabelia yabara pelivaisi  
(Mt 19.16-30; Lc 18.18-30)*

<sup>17</sup> Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaеjitsia. Nexata baja Jesús itsa naropotsijitsia, pevejëato cujinaerucarena Jesúsjavaberena. Jesús pitabarata pematatababëta nucajunua. Jumaitsi pevejëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene bexanajë taxainaenexa matababi apo peverevereцаejava? jai pevejëato.

<sup>18</sup> Nexata Jesús jumaitsi pevejëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë.  
 19 Xamë baja yapëtaneme pacuena Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitorobiaya vecuapitame itsajivi pexinaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

20 Nexata pevëjëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevëjëato.

21 Nexata Jesús asivaya tane pevëjëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabëcueneverere, cabejiobiaexanae ata, cabeyaxuabijitsia atanua tajumelivaisi yabara, nijamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevëjëatojavabelia.

22 Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevëjëato daxitacuene

bitso pexainaenë. Nexata pevejëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevejëato pecovëta Jesús pijajivi mata-  
toyorotsia naëcota. Jumaitsi:

—¡Pamonae bitso daxitacuene pexainaevi,  
tsiayapëbejetsi penajamatabëcuenecopatsinexa  
Diosojavabelia pecapanepaenexatsi Dioso  
pijanacuayabetsia! jai Jesús pijajivijavabelia.

<sup>24</sup> Nexata Jesús pijajivi jamatabëcuenenabenajaca  
itsa jumetane bajarapacuenia Jesús pejumaitsi-  
java. Nexata icatsia Jesús jumaitsi pijajivijav-  
abelia:

—Tajamonae, pamonae bitso ëpexainaejavanexa  
najamatabëxaina, bajarapamonae bitso  
tsiayapëbejetsi tsane pejonenexa taxa Dioso  
pijanacuayabetsia. <sup>25</sup> Pacuenia camello

ayainëxae, acuenebi pejonejava palutaetoitax-  
utovojotualia, bajara pijinia pacuenia bitso  
pexainaenë acuenebi tsane pejonejava Dioso  
pijatomarabetsia. Tsipaji najamatabëxaina bitso  
ayaijava pexainaenexa, jai Jesús pijajivijavabelia.

<sup>26</sup> Jesús pijajivi itsa jumetane bajara-  
pacuenia Jesús pejumaitsijava, bitso  
jamatabëcuenenabenajaca. Nexata bajarapamonae  
jumaitsi Jesúsjavabelia:

—¿Detsa nexata pitsivi panepaena Diosojav-  
abelia bitso pexainaevi ata itsa apo panepae tsane  
Diosojavabelia? jai.

<sup>27</sup> Nexata Jesús asaëya naëcota pijajivijavabelia.  
Jumaitsi pijajivijavabelia:

—Jivi raja apo caëjëpaetsi pijacuata  
penacapanepaenexa Diosojavabelia. Caenë  
Dioso caëjëpatsi jivi pecapanepaenexa. Dioso

raja caējēpatsi daxitacuene pexanaenexa, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnainavanapatsi, jai Pedro.

<sup>29</sup> Nexata Jesús jumaitsi:

—Xaniajanē pacuenia pacatsipaebijitsiatsi. Pajivi xanē tajamatabēcueneta, jivi tacapanepaelivaisitanexa pejamatabēcuenetana, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianē ata, nexata bajarapajivi bitso ayaijava Dioso rajutsianatsi pepuenetsijavanēmi matatoxenetsia. <sup>30</sup> Caejavayomijamatabēcueneta tsaponae, rajutsianatsi mapanacuataje cien xuabeje tsaponae pevajēnaeyabelia. Bajarapajivi icatsia xainaena bonē, pematapijivi ata, pejuyapijivi ata, pena ata, pexi ata, pabianē ata. Itsiata bajarapajivi itoya tsanetsi mapanacuapijivije. Bejiohiaexanabiabianatsinua. Itsiata baitsi jane bexējavabelia xainaena matacabi apo pevereverecejava. <sup>31</sup> Pamonaē aeconoxae mapamatacabitaje ayaijamatabēcuenēvi tanetsi, bajarapamonae Dioso beveliajamatabēcuenēvi exanaenatsi. Pamonaē pijinia mapamatacabitaje beveliajamatabēcuenēvi tanetsi, bajarapamonae Dioso ayaijamatabēcuenēvi exanaenatsi, jai Jesús pijajivijavabelia.

*Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi  
(Mt 20.17-19; Lc 18.31-34)*



<sup>32</sup> Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepënaponaevitsi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata.  
<sup>33</sup> Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivinuua, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia.  
<sup>34</sup> Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

*Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexatsibeje yabara pelivaisi  
 (Mt 20.20-28)*

<sup>35</sup> Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia  
 pacavajëtsijitsiatsibeje, bajarapacuenia  
 pajitsipajëbeje patanetoexanaexamëbeje,  
 jaibeje Santiagobeje Juanbeje Jesúsjavabelia.

<sup>36</sup> Nexata Jesús jumaitsi:

—¿Detsa pitsicuene pajitsipamebeje patacatoex-  
 anaenexabeje? jai.

<sup>37</sup> Nexata Santiagobeje Juanbeje jumaitsidebeje:

—Pamatacabi daxitacuene evetsianame, pane-  
 tocopatsianamebeje patanaecaenexabeje nemux-  
 uneneta vajanajuaevetsinexa. Itsanë naecaena  
 necujuanenia. Itsanë naecaena netsavenonenia,  
 jaibeje.

<sup>38</sup> Nexata Jesús jumaitsi:

—Paxamëbeje apo payapëtaemëbeje xua  
 panevajëtamebeje. ¿Pacacaëjëpabeje tsaja  
 panenacaevetsinexabeje papecabejiobiaex-  
 anaenexabeje pacuenia xanë nacaevetsianajë  
 tanebejiobiaexanaenexa? ¿Pacacaëjëpabeje  
 tsaja panenacaevetsinexabeje papecabeyaxu-  
 abinexabeje pacuenia xanë nacaevetsianajë  
 tanebeyaxuabinexa? jai Jesús pijajivi-  
 tonëbejejavabelia.

<sup>39</sup> Nexata Santiagobeje Juanbeje jumaitsidebeje:

—Jājā, panecaëjëpabeje cajena, jaibeje.

Nexata icatsia Jesús jumaitsi Santiagobeje Juan-  
 bejejavabelia:

—Paxamëbeje pacabejiobiaexanaenabeje  
 pacuenia xanë nebejiobiaexanaena. Pacabeyaxu-  
 abianabejenua pacuenia xanë nebeyaxuabiana.

<sup>40</sup> Itsiata baitsi jane xua panevajëtamebeje  
 panenaecaenexabeje, itsanë tacujuanenia, itsanë  
 tatsavenonenia, bajaraxua Dioso apo netocopatsi

patacatocopatsinexabeje. Tsipaji raja taxa Dioso ĕpitapetsivinexa abaxĕ bajaraxua toxaniavaeta, jai Jesús Santiagobeje Juanbejejavabelia.

<sup>41</sup> Diez ponĕbeje, Jesús pijajivi, itsa vĕnĕtane pepĕya bajaraxua Santiagobeje Juanbeje Jesúsjavabelia pevajĕcaejavabeje, nexata bajarapamonae jamatabĕcuenebaraanaepana Santiagobeje Juanbejejavabelia. <sup>42</sup> Nexata Jesús daxita pijajivi junata. Jesús jumaitsi pijajivijavabelia:

—Payapĕtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaĕ jinavanapa pevetsinacuanĕjĕva. Nexata bajarapanacuanĕ pevetsivi ayaijamatabĕcuenevi nataeyabiaba. Xua jamatabĕitoroba pevetsinacuanĕjĕva pejinavanapaĕvi petoexanaenexatsi, ajumesaĕya itorobabiaba petoexanaenexatsi.

<sup>43</sup> Pĕtsa paxamĕ bajarapamonae cuenejĕpaĕya bajarapacuenia paexaname itsamonaĕjavabelia. Biji rajane ponĕ paxamĕyajuvĕnĕnĕ jitsipa ayaijamatabĕcuenenĕ penaexanaenexa daxita paxamĕvecua, bajaraponĕ daxita paxamĕ bepanijajivitonĕcuenia bepacayavenonabiaba.

<sup>44</sup> Ponĕ paxamĕyajuvĕnĕnĕ jitsipa penaexanaenexa papecanamatacaitorobinĕnĕxa, bajaraponĕ daxita paxamĕ bepanijajivitonĕcuenia bepacayavenonabiaba. <sup>45</sup> Tsipaji rabaja xanĕ ata, Daxitajivi Pematapijinĕ atanĕ, apo patajopaenĕ jivi taneyavenonaenexa. Biji rajane xanĕ patajopajĕ tayavenonaenexa daxitajivi. Patajopajĕ tasivatĕpaenexa jivi ayaibitsaĕtoخانĕto

pihisiaacuene pexanaeneconimi taneconimata-  
motsinexa, jai Jesús pijajivijavabelia.

*Pacuenia Jesús itaxutoxanepanaeyaexana  
Bartimeo, bitso pitaxutotsēcēnaenē, apo petaenē,  
yabara pelivaisi*

*(Mt 20.29-34; Lc 18.35-43)*

<sup>46</sup> Jesús, pijajivi yajava, pata Jericó tomara-  
belia. Jesús icatsia, pijajivi yajava, itsamonaenua  
ayaibitsaētoxfaneto yajava, pitsapa Jericó tomar-  
avecua. Nexata Bartimeovēnēnē, Timeo pexēnato,  
eca namuto muxuneneta. Bartimeo, bitso pitaxu-  
totsēcēnaenē, apo petaenē. Jivijavabelia amoneya  
palata pevajēcabiabinē. <sup>47</sup> Nexata Bartimeo itsa  
jumetane Nazaret tomarapijinē Jesús imoxoyo pe-  
najatarucaejava, vavajai tsecae.

—¡Jesús, Davidpijinē pemomomē, nitaxutotso-  
niataema! jai tsecae Bartimeo.

<sup>48</sup> Nexata picani itsamonae jumeitavetatsi Bar-  
timeo pemoyanexa. Itsiata bitsoyo orijibia vava-  
jai tsecae.

—¡Davidpijinē pemomomē, nitaxutotsoni-  
ataema! jai tsecae Jesúsjavabelia.

<sup>49</sup> Nexata Jesús muxunanucojopa. Jumaitsi jivi-  
javabelia:

—Pajunaremena bajaraponē, jai.

Nexata bajarapamonae junarena Bartimeo. Pe-  
junatsivirena jumaitsi Bartimeojavabelia:

—Najamatabēsaētaxuare. Nonotapunare. Jesús  
raja cajunarena, jai bajarapamonae.

<sup>50</sup> Nexata Bartimeo penajumaxuabipana xu-  
abapuna. Bepijia najetabarena Jesúsjavabarena.

<sup>51</sup> Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsēcēnaenē, jumaitsi Jesúsjavabelia:

—Jesús, jitsipajē taitaxutoxanepanaejava, jai.

<sup>52</sup> Nexata Jesús jumaitsi:

—Ponare baja. Nesivajamatabējumaitsimē: “Jesús nitaxutoxanepanaeyaexanaena,” nesivajamatabējamē. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponē Jesús pepēta naponā.

## 11

*Pacuenia Jesús pata Jerusalén tomarata yabara pelivaisi*

*(Mt 21.1-11; Lc 19.28-40; Jn 12.12-19)*

<sup>1</sup> Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenē, bajarajota Jesús barēpata. Bajarajota pebarēpatsicujinae Jesús itoroba anijanēbeje pijajivitonēbeje. <sup>2</sup> Jesús jumaitsi pijajivitonēbejevabelia mapacueniaje:

—Paponarebeje mapatomarayo ecaliajevabelia. Ajena papatsiaremeliabeje, pataenutsianamebeje burro, pecētanutsinētsi. Bajarapaburro itsajivi ata abaxē apo jumaponae. Paisinaenamebeje. Payamaēcarenamēbeje tsane. <sup>3</sup> “¿Detsa xuajitsia paisinamebeje

burro?” itsa pacajai beje tsane itsajivi, nexata pajumaitsimēbeje tsane: “Vajatuxanenē raja namatavenona. Aeconoxae raja icatsia canaviatsiarena,” pajamēbeje tsane, jai Jesús pijajivitonēbeje javabelia.

<sup>4</sup> Nexata Jesús pijajivitonēbeje liabeje. Caxitarabanutabeje burro baupa muxuneneta. Cētanutatsi burro namuto muxuneneta. Nexata bajaraponēbeje burro isinabeje.

<sup>5</sup> Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsi-beje.

<sup>6</sup> Nexata bajaraponēbeje jumaitsi beje pacuenia baja Jesús itorobatsibeje. Nexata tocopatatsibeje pecaponaenexabeje. <sup>7</sup> Nexata jane baja burro capatabeje Jesús javaberena. Nexata Jesús pijajivi pijacamisajumavelia penaxatabijavanē burro tsijumajeba. Bajarapajumata Jesús ecaya. <sup>8</sup> Jesús penajetarucaenamutojavarena jivi ayaibitsaētoxaneto pijacamisajumavelia penaxatabijavanē namutua tsivajēnaeyerequejebaponatsi. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayataeya Jesús pecopiapitsinexatsi. <sup>9</sup> Jesús penajetarucaejavata jivi ayaibitsaētoxaneto Jesús pevajēnaeya namataxainaeya najetarubena. Itsabitsaētoxaneto Jesús pecovēya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponē najetarucaje!  
¡Vajatuxanenē pejamatabēcueneta najetaruca!

10 ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubenaë bajarapamonae.

11 Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomara-belia pijajivi, doce ponëbeje, yajava. Tsipaji baja caniviyotsia.

*Pacuenia Jesús bijataenuta higeranae piacuai-jibixae yabara pelivaisi*  
(Mt 21.18-19)

12 Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piajani. 13 Jesús namutovecua tajiyotalia higeranae yabaxua taenuta. Nexata Jesús taeyojopalia bajaraponae pecuai perubenaëjava. Itsa Jesús pata bajaraponaejavabelia, ëpebaxu saya tsanucae. Tsipaji cajena abaxë apo penacuaitsimatacabi. 14 Nexata Jesús jumaitsi higeranaejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higeranaejavabelia.

*Pacuenia Jesús Jerusalén tomarata templobovecua pitsapaeyaexana pecanajetabiabivi, pecomucabiabivina, yabara pelivaisi*

*(Mt 21.12-17; Lc 19.45-48; Jn 2.13-22)*

<sup>15</sup> Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templobovecua. Palata pecambiabibiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

<sup>16</sup> Jesús apo tocopatsi itsajivi ata itsacuenejawa pecaponaenexa templobojava. <sup>17</sup> Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

<sup>18</sup> Sacerdotevi penamatacaitorobivi, judíovi pecujarubivina, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijiitsiatsi. Bajarapamonae cjunavatsi Jesús. Tsipaji daxitajivi jamatabëcuenenabenajaca Jesús petsipaebilivaisi yabara. <sup>19</sup> Ajena baja meravitsia, Jesús yajavapona pijajivi Jerusalén tomaravecua.



*Pacuenia higeranae tēpanuca yabara pelivaisi  
(Mt 21.20-22)*

<sup>20</sup> Jesús pijajivi barēmajita Betania tomarata. Nexata bajayacunua Jesús icatsia, pijajivi yajava, najetaruca pecovēnamutua. Bजारapamonae taenuta higeranae baja petēpanucaejava daxita yatabutopaya. <sup>21</sup> Nexata Pedro najamatabēnapita higeranae Jesús pebijataenutsijava. Nexata Pedro jumaiti Jesúsjavabelia:

—Tajatuxanenē, jica, taema. Ponae higeranae bijataenutame, tēpanuca baja. ¿Detsa meta pacuenia tēpa baja? jai Pedro.

<sup>22</sup> Nexata Jesús jumaiti pijajivijavabelia:

—Paxamē bitso pajumecovēnēre Dioso papecatoexanaenexa pacuenia pavajētame.

<sup>23</sup> Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, pacajumecovēnētsipa mapatsuto ataje. Nexata itsa pajumaitsimē tsipae mapatsutojavabeliaje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia, pacajumecovēnētsipa. Itsa pajumecovēnētsianame Dioso papecatoexanaejavanexa, itsa panajamatabēxainamenamenua Dioso epapecajumecovēnētsijavanexa, xua pavajētsianame Diosojavabelia, Dioso pacajumecovēnētsiana. <sup>24</sup> Bजारaxuata pacajumaitsi. Daxita xua pavajētsianame Diosojavabelia, pasivajamatabējumaitsimē tsane: “Xua vajētajē Diosojavabelia, pepacuene Dioso

nejumecovënëtsiana,” pasivajamatabëjamëre. Nexata xua pavajëtsianame Diosojavabelia, Dioso pacajumecovënëtsiana. <sup>25</sup> Itsajivi pibisiacuene papecaexanaejava, pajamatabëcuenecaevare panevajëtsijavata Diosojavabelia. Nexata pabarajamatabëcuenexanepanare bajarapajivi. Nexata pijinia paneaxa, athëbëtatsia peecaenë, jamatabëcuenecaeviana paxamë ata pitabarata pibisiacuene paneexanaejava. <sup>26</sup> Paxamë itsa apo pajamatabëcuenecaevimë tsane itsanë pibisiacuene papecaexanaejava, itsa apo pabarajamatabëcuenexanepanaemënu tsane, nexata pijinia paneaxa, athëbëtatsia peecaenë, apo jamatabëcuenecaevi tsane paxamë pitabarata pibisiacuene paneexanaejava. Apo pacabarajamatabëcuenexanepanaenua tsane, jai Jesús pijajivijavabelia.

*Pacuenia Jesús cajëjëpatsi daxitacuene  
pexanaenexa yabara pelivaisi  
(Mt 21.23-27; Lc 20.1-8)*

<sup>27</sup> Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotevi penamatacaitorobivi, judíovi pecujarubivinua, judíovi pijaancianovinua, parena Jesúsjavaberena. <sup>28</sup> Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatem-plobovecuaje? jai bajarapamonae Jesúsjavabelia.

<sup>29</sup> Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecaviatsianame, nexata xanë juya pacatsipaebianatsi ponë nitoroba taexanaenexa bajarapacuene.  
<sup>30</sup> ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Panejumecanaviare baitsi jane, jai Jesús bajarapamonaejavabelia.

<sup>31</sup> Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. <sup>32</sup> “Jivi raja saya pejamatabëcueneta Juanpijinë jivi bautisabaponapona,” acuenebi vajajaijava. Tsipaji mapatomarapijivije ayaibitsaëtoxaneto Juanpijinë yabara sivajamatabëjumaitsi: “Juanpijinë raja pepacuene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

<sup>33</sup> Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

# 12

*Pacuenia exana pijamatabëcuenebejevi, itsanë pijauvabacabo petoevetsivi, yabara pelivaisi*  
(Mt 21.33-46; Lc 20.9-19)

<sup>1</sup> Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacaboxaneto uvavênëjava. Bajaraxuacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi itsa tonaveretatsi, athëbëyo pevetabiabecaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona. <sup>2</sup> Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë

itoroba pijajivitonë. Itoroba petoevetsivitsijavabelia petsicobetsatsinexatsi. <sup>3</sup> Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. <sup>4</sup> Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiaxuabatsi. Pibisiacuenia tobi-jatanetsi. <sup>5</sup> Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae totsaquibabiatsi. Itsamonae tobeyejebatsi.

<sup>6</sup> Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë. <sup>7</sup> Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonaenë najumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. <sup>8</sup> Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús

sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

<sup>9</sup> Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja pexainaenë patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

<sup>10</sup> Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia.

<sup>11</sup> Vajatuxanenë Dioso raja exanaena bajarapacueni. Nexata nacatsita pexaniacuene bitso tsane bajarapacueni, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

12 Bajarapamonae picani Jesús jamatabëvaetabatsi. Tsipaji bajarapamonae jumeyapëtanetsi Jesús pejumaitsijava bajarapamonae yabara. Itsiata abaxë apo vaetabitsi. Tsipaji cujunava jivi. Nexata baja Jesús bajarapamonae vecuapona.

*Pacuenia Jesús jamatabëcuenejëbiaya yanijobatsi impuestomatamo pematamotsijava yabara pelivaisi*

*(Mt 22.15-22; Lc 20.20-26)*

13 Fariseoviyajuvënëvi, Herodes pijajiviya-juvënëvinua, najetarubena Jesúsjavaberena. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevetsinëjavabelia.

14 Nexata bajarapamonae pata Jesúsjavaberena. Bajarapamonae jamatabëcuenejëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcuenejëbiaya Jesúsjavabelia.

15 Itsiata baitsi jane Jesús jamatabëcueneypëtanë bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

16 Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

17 Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jume-canaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejume-canaviata! jamatabëjai.

*Pacuenia Jesús tsipaeba jivi petëpaecujinae icatsia  
piasaëjavanexa yabara pelivaisi  
(Mt 22.23-33; Lc 20.27-40)*



<sup>18</sup> Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

<sup>19</sup> —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. <sup>20</sup> Nexata jinavanapa ënacaemonae siete ponëbeje. Pepo matapijinë copiaya nacojoba. Nexata bajaraponë pijava vecuatëpa pexi xainaenejeva. <sup>21</sup> Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatujëmatapijinë pita bajarapova. Bajaraponë ata icatsia tëpa pexi xainaenejeva bajarapovajavabelia. <sup>22</sup> Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xinae bajarapovajavabelia. Bajaraxuacujinae belia bajarapova ata tëpa baja. <sup>23</sup> “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapamonaeyajuvënënë, pijava tsane bajarapova bajarapamatacabi? Daxita pamona

siete ponēmibeje, nacaemonae, pitapona picani bajarapovami, jai saduceovi Jesúsjavabelia.

<sup>24</sup> Nexata Jesús jumaitsi saduceovijavabelia:

—Paxamē saya pajamatabēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēnua pacuenia Dioso caējēpatsi daxitacuene pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē.

<sup>25</sup> Pamatacabi raja petēpaevimi Dioso icatsia asaēyaexanaenatsi, apo nacojiobi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojiobinexatsi. Bajarapamonae nacojibinejeva, jinavanapaena athēbētatsia pacuenia ángelevi jinavanapa. <sup>26</sup> Itsa pepacuene paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaitsi. Bajarapabaxutota jumaitsi pacuenia Moiséspijinē Dioso barēcuaicuaijaitsi tsiquirinaemēyo petajueyecaecotiajavaverena. Abraham baja pepuatēpae, Isaac ata baja pepuatēpae, Jacob ata baja pepuatēpae, bajarapamonae yabara bajayata Dioso jumaitsi Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē, Jacob ata pijaDiosonē,” jai Dioso Moiséspijinējavabelia bajayata petēpaevimi yabara. <sup>27</sup> Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae

ata bajarapamonae Dioso yajavajinavanapa athëbëtatsia. Nexata paxamë ita pajumaitsimë: “Petëpaevi rabaja petëpaecujinae, icatsia apo asaë tsane,” ita pajamë, pinijicuenia pajamatabëcuenenavëxaniabame, jai Jesús saduceovijavabelia.

*Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi*

*(Mt 22.34-40)*

<sup>28</sup> Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

<sup>29</sup> Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijnë papemomoximë, pajumetaema. Vajatuxanenë rabaja caenë Dioso. <sup>30</sup> Bajaraponë panijatuxanenë, panijaDioso, daxita panejamatabëëthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainaesaëta ata, daxita panesaëta ata,” pejailivaisi bitso jivi bejumecovënëta daxita Dioso pitorobilivaisianë pejumecovënëtsijava

matatoxenetsia. <sup>31</sup> Bajaraxuacujinae pecoto-caevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

<sup>32</sup> Nexata icatsia judíovi pecujarubinë jumaitsi Jesúsjavabelia:

—Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. <sup>33</sup> Bejumecovënëtatsi Dioso daxita vajajamatabëthëtojavavetsina, daxita vajanajamatabëxainaesaëta ata, daxita vajasaëta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinë Jesúsjavabelia.

<sup>34</sup> Jesús itsa jumetane judíovi pecujarubinë xaniavaetsia pejumecanaviatsijavatsi, nexata Jesús jumaitsi judíovi pecujarubinëjavabelia:

—Tsiquirijavayo catosaica Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabëcueneējēbiaya livaisi apo yanijobitsi.

*Pacuenia Jesucristo yabara Davidpijinē bajayata tajëvelia: “Tajatuxanenē,” jai, yabara pelivaisi (Mt 22.41-46; Lc 20.41-44)*

<sup>35</sup> Jesús livaisi tsipaeba templobota. Jesús pi-jacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi pecapanepaenexa? Bajapamonae saya

jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinē pemomo tsane,” jai tsabiabi. <sup>36</sup> Davidpijinē bajayata Espíritu Santo pejamatabëcueneta tajëvelia jumaitsi Cristo yabara mapacueniaje:

Dioso jumaitsi tajatuxanenējavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai

Dioso tajatuxanenējavabelia, jai bajayata tajëvelia Davidpijinē mapacueniaje Cristo yabara.

<sup>37</sup> Nexata Davidpijinē bajayata Cristo yabara: “Tajatuxanenē,” itsa jai, nexata Cristo Davidpijinē apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivi pecanaējëtsinexa Cristo Dioso pexënatocuene.

Nexata jivibitsaëtoxaneto Jesús pejumetaevitsi jumebärëyatanetsi.

*Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi*  
(Mt 23.1-36; Lc 11.37-54; 20.45-47)

<sup>38</sup> Jesús jivi ayaibitsaëtoxanetojavabelia, pijajivi-javabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebapona, panejume-covënëtsiyani. Bajarapamonae jitsipabiaba tomara tuatuajëjava piapiajavanë penaxatabi-abavanapaenexa jivi peyayataenexatsi. Jitsipabiabanua bitso yayataeya pebajacobinexatsi callejava. <sup>39</sup> Bajarapamonae itsa najoneyabiaba judíovi penacaetuatabiabibonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyayataevitsi penaenexa petsinubijavanëta. <sup>40</sup> Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatavëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejume-covënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonaee Dioso apo pejume-covënëtsivi, jai Jesús judíovi pecujarubivi yabara.

*Pacuenia ofrenda rajuta Diosojavabelia  
pamona pevecuatëpaevatsi yabara pelivaisi  
(Lc 21.1-4)*

<sup>41</sup> Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaeivi, caejivi canacujitsia, ayaijava palata jepona.

<sup>42</sup> Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje.

<sup>43</sup> Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia. <sup>44</sup> Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

## 13

*Pacuenia Jesús pijajivitonëjavabelia tajëvelia tsi-  
paeba itsamatacabi itsanacuapijivi templo pexu-*

*abijavanexatsica yabara pelivaisi**(Mt 24.1-2; Lc 21.5-6)*

<sup>1</sup> Itsa baja Jesús, pijajivi yajava, pitsaparena templobovecu, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

<sup>2</sup> Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapoboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo bocae tsane, jai Jesús tajëvelia pijajivitonëjavabelia.

*Pacuenia itsijitsia Jerusalén tomarata, daxitanacuanëjava ata, mapanacua pecopiaru-caevajënaeje yabara pelivaisi*

*(Mt 24.3-28; Lc 21.7-24; 17.22-24)*

<sup>3</sup> Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

<sup>4</sup> —Patajatuxanenë, pajitsipajë patanetsipae-binexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.



<sup>5</sup> Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. <sup>6</sup> Tsipaji raja peyamaxëitojorobivinexa ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitojorobiana.

<sup>7</sup> Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane. <sup>8</sup> Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëbiana ayaicuenia nacuanëjava. Ayaijaniboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacuene itsa pataename, saya abaxë taxuxuabaponaena piayaicue, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

<sup>9</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana.

Bajarapamonae pacajumaconibabeyabiabiana judíovi penacaetuatabiabibonëta. Paxamë patajajivixaemë pacanubiana nacuaevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanë talivaisi. <sup>10</sup> Nexata daxitanacuanëpijivijava patsipaebanajetarubenaename pecapanepaelivaisinexatsi. <sup>11</sup> Itsa pacataicaena papecaneconitsinexa nacuaevetsivijavabelia, pëtsa pajamatabëcuenebëjamë panenayajivicuaicuajainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espíritu Santo pacacuaicuajiaiaexanaena. Paxamë baitsi panejamatabëcueneta apo pacuaicuajiamë tsane. <sup>12</sup> Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. <sup>13</sup> Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejume-covënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuena itsamatacabi itsijitsia mapanacuataje.

<sup>14</sup> Icatsia Jesús tajëvelia vajunupaeba papi-ayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia

mapacueniaje:

—Diosojumepaebinēmi, profeta Danielpijinē, tajēvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatamaranēmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapētaena papiayaicuene vajunupaeba mapalivaisitaje.) Nexata paxamē pataename bajarapapiayaicuene penucaejava templobota, itsajota picani apo benucae. Nexata Judea nacuata pejinavanapaevi itsa vēnēlivaisitaena bajarapapiayaicuene penucaejava templobota, pētsa nubena. Naxanitsiayo bajarapamonae rēcēpecaena ibotsutonējavabelia. <sup>15</sup> Pajivi pijabojumata athēbēyo ecaya, itsa vēnēlivaisitaena bajarapapiayaicuene penucaejava templobota, bajarapajivi perunaecujinaetsica bepījia najetabajiraviana. Pētsa joneya pijaboyalia pejutsinexa pecobecovē. <sup>16</sup> Pajivi pijinia nacuenebaponapona pijapabita, itsa vēnēlivaisitaena bajarapapiayaicuene penucaejava templobota, bepījia najetabajiraviana. Pētsa naviata pijaboyabelia pejutsinexa penaxatabi-  
java. <sup>17</sup> ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejibitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! <sup>18</sup> Bajaraxuata tajēvelia Diosojavabelia pavajēcare piayapēbejematacabita papecatocopiapatsiyaniva bajarapapiayaicuene. Nexata pamatacabi parēcēpecaename, pexaniamatacabi Dioso pacatocopatsiana bitso nabejibitsiaya paneponaeyaniva. <sup>19</sup> Tsipaji

raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapae-matacabianëminexa, bitso jivi nabejiobitsia pejinavanapaeyaniva. <sup>20</sup> Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

<sup>21</sup> Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. <sup>22</sup> Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai

tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarpacuenia itsamonae yamaxëitojorobaponaenatsi. Itsiata pamonaepapacuenia Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. <sup>23</sup> ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

*Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi*

*(Mt 24.29-35, 42, 44; Lc 21.25-36)*

<sup>24</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejibitsiaya jinavanapaena. Nexata jivi nabejibitsiaya pejinavanapaematacabicujinae matacabipijjuameto aitaquiri tsane. Meravipijjuameto ata aitaquiri tsane. <sup>25</sup> Tulupu ata othopaenica irabetsica. Daxitacuene, xua rubena athëbëtsia, najëabiana. Xaniavaetsia apo rubenae tsane. <sup>26</sup> Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucæjava. Patsianicajë daxitacuene taevetsinexa. Tanivenivenaecotia yajavapatsianicajë. <sup>27</sup> Bajaraxuacujinae

ángelevi itorobianajë, pamonae tajajivi, Dioso pitapetsivitsi, daxitanacuanëjavaverena tanetocae-tuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

<sup>28</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa.

<sup>29</sup> Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica. <sup>30</sup> Xaniajanë pacuenia pacatsipaebijitsiatsi.

Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena.

<sup>31</sup> “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>32</sup> Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

<sup>33</sup> Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica.

<sup>34</sup> Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovëta.

Nexata pijajiviyajuvënënë itoroba baupa pevetsinënexa petoetabiabinexatsi pijabobaupa. Bo

pexainaenë jumaitsi bajaraponëjavabelia: “Xaniavaetsia netoetabiabianame baupa matapania tapatsimatacabijavabelianexa,”

jai bo pexainaenë. <sup>35</sup> Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë.

Meravi tuatujëta ata patsipajë. Matacabivëpata ata patsipajë. Bajayacunua ata patsipajë. <sup>36</sup> Bajaraxuata xania baja tsane.

Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë,

pacacaxitajarabijitsipatsi panemajitsijavata.  
<sup>37</sup> Palivaisi pacatsipaebatsi paxamëjavabelia,  
 daxitajivinexa jumaitsinë. ¡Daxitamatacabi  
 saya panecopiaevetavanapaename! jai Jesús  
 pijajivijavabelia.

## 14

*Pacuenia picani Jesús pijavajabitsaë  
 jamatabëvaetabatsi yabara pelivaisi  
 (Mt 26.1-5; Lc 22.1-2; Jn 11.45-53)*

<sup>1</sup> Anijamatacabibeje abaxë ajibi pejonenexa  
 pascuafiesta, itsafiestanua, pafiestajava judíovi  
 baxane levadurata matajërëbinejeva pexanaepan.  
 Nexata bajarapafiestabejevajënaeya, sacerdotevi  
 penamatacaitorobivi, judíovi pecujarubivinua,  
 najumejaita picani bajarapafiestajava  
 pevaetabinexatsi Jesús. Penajumetsënëtsilivaisita  
 picani jamatabëvaetabatsi Jesús pebeyaxuabinex-  
 atsi. <sup>2</sup> Itsiata bajarapamonae najumaitsi:

—Fiestajava meta abaxë apo vaetabi tsanetsi  
 jivi vajanacaitsacueniabiyániva, najai bajarapa-  
 monae.

*Pacuenia Jesús petiriva tsimataepanatsi petuxu-  
 juviaceitera yabara pelivaisi  
 (Mt 26.6-13; Jn 12.1-8)*

<sup>3</sup> Jesús ponapona Betania tomarata, Simón  
 pijabota. Simón bajayajebi bitso peper-  
 abëtsabanaenëmi. Nexata Jesús pexaeyecaejavata  
 mesata, petiriva cobenaimoxoyorenatsi petuxu-  
 juviaceitera, nardovënëra, alabastrobotellabëta  
 pejeaceitera. Bajarapora bitso penamatamotsira.  
 Nexata bajarapova yavëtoxobiaxuaba bajarapora,



petuxujuviaceitera. Bajaraxuacujinae Jesús tsimataepanaicatsi bajarapaaceitera. <sup>4</sup> Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? <sup>5</sup> Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae ëpamonae.

Bajarapamonae anaepana bajarapovajavabelia.

<sup>6</sup> Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. <sup>7</sup> Daxitamatacabi raja bepejiobivi jinavanapa itsaxuayo pajinavana-pame. Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatacabi apo ponaponaenë tsane paxamëjavata. <sup>8</sup> Mara papetirivaje pexaniacuene netoexana pacuenia baja cuenecaëjëpatsi. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. <sup>9</sup> Xaniajanë pacuenia

pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabi-abiananua pacuenia exana xanëjavaberena mapapetirivaje, jai Jesús pijajivijavabelia.

*Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi (Mt 26.14-16; Lc 22.3-6)*

<sup>10</sup> Jesús pijajivi doce ponëbejeyajuvënënë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. <sup>11</sup> Nexata sacerdotevi penamatacaitorobivi itsa tane bajara-pacue, barëya. Jumaitsi bajarapamonae Judas-javabelia:

—Palata pacarajutsianatsi, jai.

Nexata jane baja xuacujinae Judas Jesús naitax-utocaevetaponaponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

*Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponaeñajë patacamitsaex-  
anaenexa pascua fiestamatacabi pexaejava  
nexaenexa? jai Jesús pijajivi.

<sup>13</sup> Nexata Jesús itoroba anijanëbeje pijajivi-  
tonëbeje. Jumaitsi:

—Tomarabelia paponarebeje. Bajara-  
jotalia pacaxitajarabianamebeje mera  
canalito pecanajetarucaenë. Bajaraponë  
papënanajetarucaenamebeje. <sup>14</sup> Pabota bajaraponë  
joneyojopaena, bajarapabo pexainaenëjavabelia  
pajumaitsimëbeje tsane: “Vajanacacujarubinë  
raja jumaitsi: ‘¿Detsa jota pënëyatuucutsibo  
eca, pabota tajajivi barëxaejitsianë xua jivi  
baxane pascua fiestamatacabi?’ jai raja  
vajanacacujarubinë,” pajamëbeje tsane  
bajarapabo pexainaenëjavabelia. <sup>15</sup> Nexata  
athëbëabetsia anijairabeje pënëyatuucutsibojavata,  
pacatsitajëtsianabeje. Bajarapaboënëta  
athëbëyotsia paira ayaiënëtuatuajë tsane.  
Daxitacuene bajarajota xainaena. Nexata vajax-  
aejavanexa bajarajotatsia paexanaenamebeje, jai  
Jesús pijajivitonëbejejavabelia.

<sup>16</sup> Nexata jane baja ponabeje Jesús pijajivi-  
tonëbeje. Patabeje baja tomarabelia. Caxi-  
tajarababeje daxita pacuenia Jesús jumaitsi-  
beje. Nexata xua jivi baxane pascua fiestamat-  
acabi daxita Jesús pijajivi pebarëxaenexa, bajara-  
ponëbeje exanabeje jane baja.

<sup>17</sup> Itsa baja meravitsia, Jesús patajopa bajara-  
jota pijajivi, doce ponëbeje, yajava. <sup>18</sup> Daxita  
mesata pexaeyenaejavata, Jesús jumaitsi pijajivi-  
javabelia:

—Xaniajanë pacuenia pacatsipaebijitsi-atsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

<sup>19</sup> Nexata Jesús pijajivi bejamatabëjjobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

<sup>20</sup> Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane.

<sup>21</sup> Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

<sup>22</sup> Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

<sup>23</sup> Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Paneraju-tame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

<sup>24</sup> Jesús pijajivijavabelia jumaitsi:

—Tajana raja othopaena jivi ayaibitsaëtoxaneto pecapanepaenexatsi. Nexata tatëpaejava peja-matabëcueneta, jivi yapëtaena pepacuene xani-ajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. <sup>25</sup> Xaniajanë pacuenia pacatsipaebi-jitsiatsi. Xanë rabaja matavëjëa apo apaenë tsane uvacuaira mapanacuataje, matapania icat-sia apaenajë Dioso pijanacuatatsia pejanauvac-uaira, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename taja-jivitonëcuenemë,” jai, yabara pelivaisi*

*(Mt 26.30-35; Lc 22.31-34; Jn 13.36-38)*

<sup>26</sup> Jesús pijajivi barënxëana Diosojumevajianë. Bajaraxuacujinae Jesús pijajivi barëpona petsu-tojumabelia. Patsutojumata olivonaenë apaax-ayo, bajarapatsutojumabelia barëpona. <sup>27</sup> Nexata bajarapatsutojumata Jesús jumaitsi pijajivijav-abelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota

paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. <sup>28</sup> Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

<sup>29</sup> Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>30</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>31</sup> Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsi-ata cajena apo nayavajunuaxainaenë tsane nija-jivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia  
Getsemanívënëjavata yabara pelivaisi  
(Mt 26.36-46; Lc 22.39-46)*

<sup>32</sup> Jesús, pijajivi yajava, pata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

<sup>33</sup> Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjireca. <sup>34</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

<sup>35</sup> Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiohiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejibitsiaya pebeyaxuabiyaniatsi. <sup>36</sup> Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajibicueneta. Daxitacuenene raja cacaëjëpa nexanaenexa. Nexata necapanepare bajarapabejibicuenenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

<sup>37</sup> Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaējēpae tsabaja rovia caepatoyo ata paneaitavatsenaenexa? <sup>38</sup> Pētsa pamajitame. Paitavamēre. Pavajēre Diosojavabelia pibisiacuene paneexanaeyaniva. Tsipaji raja dovathi pacajamatabēcuenējēbiana. Paxamē picani panejamatabēcueneta pexaniacuene jamatabēpaexanabiabame. Itsiata baitsi jane apo pajamatabēcuenesaēmē pexaniacuene paneexanaenexa, jai Jesús Pedrojavabelia.

<sup>39</sup> Nexata icatsia Jesús pona pecovēyabelia pevajētsinexa icatsia Diosojavabelia. Bajara icatsia pacuenia Jesús vajēta Diosojavabelia pacuenia vajēta copiata. <sup>40</sup> Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapētae pacuenia jumecanaviatsijitsia Jesúsjavabelia. <sup>41</sup> Icatsia abaxē Jesús naviata pecovēyabelia pevajētsinexa icatsia Diosojavabelia. Bajaraxuacujinae, acueyabi baja xuabeje pevajētsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxē tsarovia tsiteca pamajitanubename? Ajibi rabaja. Copiapata rabaja paepatota xanē, Daxitajivi Pematapijinēnē, necanajetsijitsia pibisiacuene pexanaevi pecobeyabelia. <sup>42</sup> Panonobapunare baja. Ponaenatsi baja. Imoxoyo rabaja najetaruca tajavajabitsaē pecobeyabelia tanecanajetsinēnexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaē yabara*



*pelivaisi**(Mt 26.47-56; Lc 22.47-53; Jn 18.2-11)*

<sup>43</sup> Jesús pijavajabitsaë pevaetabijavatanexatsi, cuaicuajai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënemi. Judas pënanajetarubenatsi jivi ayaibitsaëtoxaneto. Bajarapamonaeyajuvënëvi itsamonæ canajetarubena espadanë. Itsamonæ canajetarubena naebonë yajava. Bajarapamonæ itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata.

<sup>44</sup> Judas pebarërenavajënae bajarapamonæ, copiaya baja cajena Judas tsipaeba pacuenia bajarapamonæ yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaronë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

<sup>45</sup> Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene.

<sup>46</sup> Nexata jane baja Jesús pijavajabitsaë vaetabatsi. Cobecëtatsi xaniavaetsia.

<sup>47</sup> Bajarajota Jesús pijajiviyajuvënënë pijaespada navemarajonotaxuabina. Muxuyoropaebi-axuaba sacerdotevi pepo penamatacaitorobinë

pijajivitonē. <sup>48</sup> Nexata Jesús jumaitsi pevaetabivitsijavabelia:

—Paxamē meta panetaneme betanacobetoxotsinē. Bajaraxuata pacaponame espadanē, naebonē yajava, patanevaetabinexamē pacuenia pavaetababiabame penacobetoxotsinē. <sup>49</sup> Xanē caematacabi canacujitsia Dioso pejumelivaisi paxamējavabelia pacatsipaebabiabatsi templobota. Itsiata bajarapamatacabi apo panevaetabimē. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajēvelia jumaitsi xanē yabara, jai Jesús pevaetabivitsijavabelia.

<sup>50</sup> Nexata jane baja Jesús pijavajabitsaē pevaetabijavatatsi, daxita Jesús pijajivi xuabarēcēpecatsi pacuenia baja cajena Jesús jumaitsi tajēvelia pijajivijavabelia.

*Pacuenia pevejēato najetabajirava yabara pelivaisi*

<sup>51</sup> Pevējēato pēnanajetaruca Jesús pecaponaevitsi. Sábanata namataquinanajetaruca. Nexata pevejēato bajarapamonae yasábanavaetabatsi.

<sup>52</sup> Nexata pevejēato sábana naisinaxuaba. Najetabajirava jumasanē.

*Pacuenia Jesús nutatsi judíovi penamatacaitorobivi pitabarata yabara pelivaisi*

(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Jesús caponaliatsi sacerdotevi pepo penamatacaitorobinē pijaboyabelia. Nacaetuata bajarajota daxita sacerdotevi penamatacaitorobivi,

judíovi pijaancianovi ata yajava, judíovi pecujarubivi ata yajava. <sup>54</sup> Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajúnuatsi. Nexata sacerdotevi pepo penamatacaitorobinë pijabopanabota, Pedro nanonopeca isoto muxuneneta templobopijipolicíavita.

<sup>55</sup> Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. <sup>56</sup> Itsamonae saya penajumetsënëtsilivaisi paeba Jesús yabara. Itsiata caelivaisi najuapaebi ata, najumejëpaeya apo paebi bajarapamonae. <sup>57</sup> Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

<sup>58</sup> —Paxanë raja, pamatabëxëyo panubenajë majotaje, pajumetaniji Jesús pejumaitsijava. Bajaraponë jumaitsi: “Xanë raja xuabianicajë mapatemploje, jivi pexanaebo. Acueyabi matacabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

59 Itsiata daxita bajarapamonae najumejëpaeya apo paebi.

60 Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejume-canaviatsinexa? ¿Xaniajai tsabaja pacuenia mapamonae caneconitsiajumaitsije? jai Jesúsjavabelia sacerdotevi pepo penamatacaitorobinë.

61 Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinë jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

62 Nexata Jesús jumaitsi bajaraponëjavabelia:

—Jãjã, xanë rabaja. Paxamë raja panetaename, Daxitajivi Pematapijinënë, taecaejava Dioso pecujanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërebota, jai Jesús.

63 Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Pijacuata rabaja pejumaitsijumeta naneconita. Pematatsënëa apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi.

64 Paxamë rabaja pajumetaneme maponëje Dioso apo pejitsipaecuenia pecuaicuaijajava. Tsipaji Dioso bepexënato nataeya cuaicuaijai. ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

65 Nexata bajarapamonae yajuvënëvi Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabarapacabiauxuabatsi Jesús.

*Pacuenia jane baja Pedro nayavajunuaxaina Jesús pijajivitonëcuene yabara pelivaisi*

*(Mt 26.69-75; Lc 22.56-62; Jn 18.15-18, 25-29)*

66 Itsa abaxë Jesús sacerdotevi pepo penamatacaitorobinë pijabo ënëtuatujëalia yanijobaponatsi xua yabara naneconitsiaexanaejiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinë pijabota penacuenebiva. 67 Bajarapova Pedro taeyetatsi penanonopecaejavata. Nexata

bajarapova naitaxutobabatsia asaëya taenucatsi Pedro. Jumaitsitsi:

—Xamë ata rabaja naponaponame Jesústa, Nazaret tomarapijinëta, jaitsi.

<sup>68</sup> Nexata Pedro itsiata nayavajunuaxaina Jesús pijajivitonëcuene. Nexata Pedro jumaitsi bajarapovajavabelia:

—Jume raja. Apo yapëtaenë cajena bajaraponë. Apo yapëtaenë pacuene yabara nejumaitsimë, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. <sup>69</sup> Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponëje Jesús pijajiviyajuvënënëje, jai bajarapova Pedro yabara.

<sup>70</sup> Icatsia nexata Pedro jumaitsi:

—Jume raja. Apo yapëtaenë cajena bajaraponë, jai.

Bajaraxuacujinae, icatsia caepatoyocujinae, bajarajota penubenaevi Pedro jumaitsitsi:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijinëmë. Galilea nacuapijivi pecuaicuaiaicuenia cuaicuaijamë, jaitsi.

<sup>71</sup> Nexata Pedro pejumexaniataenexatsi, ajumesaëya jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena ponë yabara panejumaitsimë, jai Pedro.

<sup>72</sup> Itsa baja Pedro najumevereta bajarapacuenia pejumaitisijava, vacara icatsia fiaba. Nexata bajarajota Pedro najamatabēnapitajaraba pacuenia Jesús jumaitsitsi: “Anijajumebeje vacara pefiabivajēnaeya, nayavajunuaxainaename tajajivitonēcuenemē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabēxaina Jesús pejumaitisijumetsi yabara. Pedro nexata nua.

## 15

*Pacuenia Jesús nutatsi Pilato pitabarata yabara pelivaisi*

*(Mt 27.1-2, 11-14; Lc 23.1-5; Jn 18.28-38)*

<sup>1</sup> Ajena baja matacabi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsēnēa itsamonae bajarapitsijamatabēcuenevi yajavanacaetuata penabarēcuaicuaijainexa. Bajaraxuacujinae bajarapamonae Jesús cobecētsiaya caponaliatsi nacuaevecsine Pilatojavabelia. <sup>2</sup> Nexata Pilato yanijobatsi Jesús.

—¿Xamē tsaja judíovi pepo nevetsinē? jaitsi.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

<sup>3</sup> Sacerdotevi penama itsamonae bajarapitsijamatabēcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

<sup>4</sup> Nexata icatsia Pilato yanijobatsi Jesús.

—¿Itsaliivaisiyo ata tsaja apo yapëtaemë nejume-canaviatsinexa? ¿Apo jumetaemë mapacuenia pecaneconitsijavaje? jaitsi.

<sup>5</sup> Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

*Pacuenia baja Pilato tocopata Jesús pebeyaxu-abinexatsi yabara pelivaisi*  
(Mt 27.15-31; Lc 23.13-25; Jn 18.38–19.16)

<sup>6</sup> Nacuaejetsinë Pilato xaina pijacujirucuenë. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenë copatabiaba jivi pesivajamatabëcuene xanepanaenexatsi.

<sup>7</sup> Pamatacabi Jesús naneconitsiaexanatsi, bajarapamatacabi Barrabásvënënë jivi pebarëbevi barënaneconitsiaponapona penaneconitsivi pejebabiabibota. Barrabás, itsamonae yajava, barënabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. <sup>8</sup> Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabi-abame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi



pejebabiabibovecua, jai bajarapamonae Pilatojavabelia.

<sup>9</sup> Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimě pepo papecaevetsině? jai Pilato.

<sup>10</sup> Bajarapacuenia Pilato jumaitsi tsipaji yapětane pajamataběcuene yabara sacerdotevi penamatacaitorobivi tocaponarenatsi Jesús. Pilato jamataběcueneyapětane sacerdotevi penamatacaitorobivi Jesús pecueneitoyaxaetsi petocaponaejavatsirena.

<sup>11</sup> Nexata bajarapamonae asaëya vajěca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajěcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pětsa pavajěcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

<sup>12</sup> Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponějavabeliaje: “Judíovitsi pepo vajanacaevetsině,” paneyabarajainějavabelia? jai Pilato judíovijavabelia Jesús yabara.

<sup>13</sup> Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

<sup>14</sup> Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabi-abarutsiaexanaejitsipajë? jai Pilato Jesús yabara. Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

<sup>15</sup> Nexata baja Pilato tocopata Barrabás pepit-sapaenexa penaneconitsivi pejebabiabibovecua jivi barajamatabëcuenexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

<sup>16</sup> Nexata baja vajabitsaëvi Jesús caponaliatsi nacuaeavetsinë Pilato pijaboxanetojavabelia. Nexata bajarajota nacaetuata daxita vajabitsaëvi.

<sup>17</sup> Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaeavetsinë banaxatata, bajaraxua xatatatsi benacuaeavetsinëcuenia petaenexatsi. Coronacuenia pemataxatatsinexatsi, peejuvi-toyoroto tsimataexanatsi. Bajarapatoyoroto Jesús mataxatatatsi.

<sup>18</sup> Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponae bajarapamonae Jesúsjavabelia.

<sup>19</sup> Bajarapamonae caenë canacujit-sia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata.

<sup>20</sup> Jesús quenetsiataeya

pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesús cruzajavabelia cobematabiabarutatsi yabara pelivaisi*

*(Mt 27.32-44; Lc 23.26-43; Jn 19.17-27)*

<sup>21</sup> Alejandrobeje Rufobeje paxa, Simónvënënë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

<sup>22</sup> Caponaliatsi Jesús Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejajume.

<sup>23</sup> Bajarajota picani Jesús rajutatsi vinora piapaenexa, pematajerëabira mirravënëjavata, bitso penavixaetaeyaniva pecobematabiabiavatsi cruzajavabelia. Itsiata Jesús apo apae.

<sup>24</sup> Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

<sup>25</sup> Bajayacunuaepatota, a las nueve, Jesús cobematabiabarutatsi cruzajavabelia.

<sup>26</sup> Bajarajota Jesús pematobocoto matatsënëyo

yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara.<sup>27</sup> Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi.<sup>28</sup> Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso pejumelivaisibaxutota tajëvelia jumaitsi Jesús yabara mapacueniaje: “Naneconitsiaexanaenatsi bepibisiacuene pexanaenëcuenia,” jai baja cajena tajëvelia Dioso pejumelivaisibaxutota Jesús yabara.

<sup>29</sup> Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë.<sup>30</sup> Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

<sup>31</sup> Bajara pijinia pacuenia sacerdotevi penamatacaitorobivi, judíovi pecujarubivi ata, capoc-

aponatsi Jesús. Ĕpamonae najumaitsi:

—Maponĕje itsamonae yabara jumai tsabiabi: “Capanepaenajĕ jivi,” jai tsabiabi. Caranata pijacuata penacapanepaenexa, apo caĕjĕpaetsi. <sup>32</sup> Itsa xaniajai pepacuene Cristo, athĕbĕvetsica Dioso pitorobinĕtsica jivi pecapanepaenexa, Israel nacuapijivi pepo pevetsinĕnexanua, aeconoxae runaenica cruzajavavetsica vajataenexa. Nexata jane baja jumecovĕnĕtsianatsi Cristonĕcuene, najai bajarapamonae capocaponaeya Jesús yabara.

Ponĕbeje ata Jesús yajavacobematabiabarutatsi, bajaraponĕbeje ata, Jesús bijataerucatsibeje.

*Pacuenia baja Jesús tĕpa yabara pelivaisi*  
(Mt 27.45-56; Lc 23.44-49; Jn 19.28-30)

<sup>33</sup> Jesús baja itsa tĕpaejitsia, ajena matonejejit-sia, daxita nacujava aitaquiri tsajuni. Matapania caniviyojavabelia, bejamatabĕcuene a las tres, nacua napebeta icatsia. <sup>34</sup> Nexata icatsia paepatotata nacua napebeta, bajarapaepatota pinijicuenia Jesús aĕjai. Jumaitsi:

—Eloi, Eloi, ĕlama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ĕdetsa xuajitsia baja tajaepato necopatame?” pejaijume.

<sup>35</sup> Nexata itsamonae bajarajota penubenaevi bijiaya jumetane bajarapacuenia Jesús pejumait-sijava. Nexata saya jamatabĕcuenenavĕxaniabiaya jumaitsi bajarapamonae:

—Jica, pajumetaema. Mara ponĕ junata profeta Elĕaspijinĕmije, Diosojumepaebinĕmi, jai bajarapamonae.

<sup>36</sup> Nexata bajarapamonaeyajuvënëne piajatuvinorayalia bepijia jabutaxuaba esponjavënëjava. Bajaraxuacujinae esponjavënëjava naeboupita cëtaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi bajaraxua petsutsuninexa, bajaraponë jumaitsi penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspijinë itsa najetaruca cruzavecua penutsinexatsitsica Jesús, jai bajaraponë capocaponaeya.

<sup>37</sup> Jesús icatsia pinijicuenia aëjai. Bajaraxuacujinae jane baja Jesús tēpanajereca.

<sup>38</sup> Paepatota Jesús tēpanajereca, bajarapaepatota templobo ënëtuatuajëalia peyatuucutarutsipana, ayaipapaëbërëpanaxaneto, titititica tuatuajëareca, athëbëvetsicacujinae irabereca.

<sup>39</sup> Nexata paepatota Jesús tēpanajereca, vajabitsaëvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaëjaijava. Taenucanua Jesús petēpanajetsijavareca. Nexata vajabitsaëvi pijacapitán jumaitsi:

—Matsaena ponë tēpaje, pepacuene baja rovia Dioso pexënato, jai.

<sup>40</sup> Bajarajota petiriavibitsaëtoxaneto tajiyoverena taenubena Jesús petēpaejava. Bajarapapetiriavi tuatuajëta nanubena mapamatabëxëyoje. Itsava Mariávënëva, Magdala tomarapijiva. Itsava Salomévënëva. Itsava icatsia Mariávënëva. Bajarapova Santiagobeje Josébeje pena. Bajaraponë Santiago, pevëjëato abaxë itsanë Santiagovënënevëcua.

41 Pamatacabi abaxë Jesús ponapona Galilea nacuata, bajarapapetiriavi Jesús pënajinavanapatsi peyavenonaenexatsi. Papetiriavibitsaëtojavata Mariábana nanubena, bajarapapetiriavi ata Mariábana Jesús najuapënaponarena Galilea nacuaverena Jerusalén tomaraberena.

*Pacuenia Jesús petëpaenë mëthëtatsi yabara peliv-  
aisi*

*(Mt 27.57-61; Lc 23.50-56; Jn 19.38-42)*

42-43 José Arimatea tomarapijinë, judíovi pevetsinë, peyaiyataenëtsi. Bajaraponë José copiaevetaponapona pecopiapatsijava pamatacabi caenë Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevajënaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata bajarapaepatota José acueneura ata, najamatabësaëta. Nexata lia nacuaevetsinë Pilatojavabelia. Nexata José vajëta Pilatojavabelia petocopatsinexatsi Jesús petëpaenë pemëthëtsinexa. <sup>44</sup> Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaëvi pijacapitán. Nexata Pilato yanijoba vajabitsaëvi pijacapitánjavabelia, Jesús petëpaecuene Pilato peyapëtaenexa. <sup>45</sup> Nexata vajabitsaëvi pijacapitán tsipaeba Pilatojavabelia.

—Jesús rabaja capanepaeya tëpa, jai.

Nexata jane baja Pilato José tocopatatsi cruzajavavetsica pepitsinexa Jesús petëpaenë.  
<sup>46</sup> Nexata José comuata pexaniaviriasábana. Bajaraxuacujinae José jane baja cruzajavavetsica pitsica Jesús petëpaenë. Daxitanëreca mataquionaeya matakacëba pexaniaviria piapiasábanapanata. Bajaraxuacujinae itsajota cajena José iboitapajanitojavata pinijiibovaju exanaeyaexanabuata petëpaevi pebuataponaenexa, bajarapaibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata. <sup>47</sup> María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

## 16

*Pacuenia Jesús petëpaecujinae icatsia asaë yabara pelivaisi*

*(Mt 28.1-10; Lc 24.1-12; Jn 20.1-10)*

<sup>1</sup> Judíovi baja penacueraevetsimatacabi itsa verevereca, acueyabi povamaxëto comuata petuxujuvira. Itsava Mariávënëva, Magdala tomarapijiva. Itsava Salomévënëva. Itsava icatsia Mariávënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë.  
<sup>2</sup> Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia.



<sup>3</sup> Nexata bajarapamonae namutualia najumaitsi tsanajetarubenaē:

—¿Jipatsa meta nacatotixitsiana Jesús peyavajuvēpa acatabuatsiibopanaxanetotsi? najai tsanajetarubenaē bajarapamonae.

<sup>4</sup> Nexata bajarapamonae itsa imoxoyotabuatapona, naēcobarēcēpalia ibovajujavabelia. Nexata taeyabuata ibopanaxanetomi petixitabuatsijavalia ibovajuvēpavecua. Bajarapaibopana bitso pinijiibopanaxaneto. <sup>5</sup> Nexata petiriavi itsa joneya Jesús pebuatsiibovajutsijavalia, taeyeta pecujanenia pevējēato. Bajaraponē naxatateca piapiajava penioponaējava. Nexata petiriavi najunaviaca. <sup>6</sup> Nexata pevējēato jumaitsi petiriavijavabelia:

—Pētsa panajunaviacame. Paxamē picani pajaitame Jesús, Nazaret tomarapijinē, ponē cobematabiabarutatsi cruzajavabelia. Asaē rabaja icatsia bajaraponē petēpaecujinae. Ajibi rabaja tsaruceae majotaje. Pataema jane itsajota picani buatatsi. <sup>7</sup> Paponare baja. Patsipaebianame pijajivijavabelia, Pedrojavabelia ata. Pajumaitsimē tsane bajarapamonaejavabelia: “Jesús pina panevajēnaeyabelia pona Galilea nacuyabelia. Baja pina jotalia pacaxitajarabianame Jesús pacuenia baja pacajumaitsi,” pajamē tsane pijajivijavabelia, jai pevējēato petiriavijavabelia.

<sup>8</sup> Nexata saya bajarapapetiriavi rēcēpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi it-sajivijavabelia ata. Tsipaji bitso junava.

*Pacuenia Jesús petëpaecujinae, icatsia  
itsa asaë, tsitanaitajëta María Magdala  
tomarapijivajavabelia yabara pelivaisi  
(Jn 20.11-18)*

<sup>9</sup> Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaë petëpaecujinae. Bajarapamatacabi copiata Jesús tsitanaitajëta María, Magdala tomarapijivajavabelia. Bजारapova cajena copiaya Jesús vecuacapitsapa siete padovathibeje itsa abaxë Jesús apo beyaxuabitsi. <sup>10</sup> Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. <sup>11</sup> María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai.

Itsiata Jesús pijajivi apo jumexaniataetsi María.

*Pacuenia Jesús petëpaecujinae icatsia itsa asaë,  
tsitanaitajëta pijajivitonëbejevavabelia yabara pelivaisi  
(Lc 24.13-35)*

<sup>12</sup> Jesús pijajivitonëbeje najetarucabeje namutua. Nexata Jesús pijajivitonëbeje namutua pe-najetarucavejavatabeje, Jesús tsitanaitajëta beitsanëcuenia pijajivitonëbejevavabelia. <sup>13</sup> Nexata Jesús pijajivitonëbeje itsa tanebeje Jesús, naviatecabeje.

Nexata pacuenia tanebeje Jesús, tsipaebabeje itsamonaē Jesús pijajivijavabelia. Itsiata bajarapamonae apo jumexaniataetsibeje.

*Pacuenia Jesús petēpaecujinae, icatsia itsa asaē, pijajivi itoroba pexanialivaisi jivi petsipaebanajetarubenaenexa daxitanacuanējava yabara pelivaisi (Mt 28.16-20; Lc 24.36-49; Jn 20.19-23)*

<sup>14</sup> Bexēajavabelia icatsia Jesús tsitanaitajēta pijajivi once ponēbejejavabelia penabanenaejavata mesata. Nexata Jesús pinijicuenia muxujioba pijajivi piamatabēcuenetajaxae. Muxujiobanua apo pejumecovēnētsixae petsipaebijavatsi pamonae tane Jesús icatsia piasaējava petēpaecujinae. <sup>15</sup> Nexata Jesús jumaitsi pijajivijavabelia:

—Paponare daxitanacuanējava daxitajivi panetsipaebanajetarubenaenexa pexanialivaisi pecapanepaelivaisinexatsi. <sup>16</sup> Pajivi jumecovēnētsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovēnētsi tsane bajarapalivaisi, daxitamatacabijavabelianexa naneconitsiana Diosojavabelia. <sup>17</sup> Pamonae peneta jumecovēnētsiana bajarapalivaisi, mapacuenia exanavanapaenaje. Tavēnēta jivivecua capitsapaponaena dovathi. Itsaviriajumetanua, apo penatsipaebijumemi ata, jemata natsipaebiana. <sup>18</sup> Bajarapamonae jomo pecobeta pitsi ata tsane, apae atanua tsane jivi petēpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsēnēvereca, pejayatsijivi

jamatejema tsane piavitanejavavecua, jai Jesús pijajivijavabelia.

*Pacuenia Jesús petëpaecujinae, icatsia itsa asaë, naviata baja athëbëabetsia yabara pelivaisi*

*(Lc 24.50-53)*

<sup>19</sup> Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujanenia penajuaevetsinexabeje daxitacuene. <sup>20</sup> Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamonaë jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcueneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabijavata.

**Dios pejumelivaisibaxuto  
pejanalivaisibaxuto  
New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guahibo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022

bc03f416-faf8-5000-bfb5-5ca8a3fa98cf